


扶桑閣集跋本九卷附詩一卷吾邑龍山朱日觀先生所著也先生為正溪司李哲嗣弱冠印才名噪甚一省輦下諸公如陳澤州李合肥王新城皆推重為華國器然竟以諸生終可慨也是集諸著錄家及邑乘諸牒皆不載余偶於故方舖中購得之惜僅西瞻錦江戎州車將西山等子集及艾子從游詩一卷而已蓋先生所歷皆故以獻寇肆毒之區瘡痍未復黍離之嘆情見乎詞可補蜀碧及流寇志所未備而滇洋山人感舊集中尚有平山堂務周耕產考廉寧志餘問載有日觀詩集四卷曹

相石明於東山樓集注有兩章紀游草其所以缺者未知
即是數集否余亦未敢臆擬長夏諒畢即跋數語成
之以待辭舍也時道光丁亥又五月芷湘居士書庭芳跋
於滄江寓館之愛吾廬




扶桑閣集

浙江朱人遠著

西
瞻
詩

書林劉鍾甫梓行



西瞻錄別

序

查容 韜荒

余始之楚所過蕲黃沔鄂諸郡縣則皆童山廣澤葭菼
 刺天而田廬畊牧絕少其城市則皆編茅以居多關雒
 邊徼之人厥聲咻者十之六稍西而北為鄖襄則十之
 三稍南而西北為歸夔則十之二村墟蕭條臺雉毀塌
 此皆荆蜀交壤流賊屠戮之餘也而蜀人仕楚者為余
 言賊破蜀以計掩殺蜀人蜀地數千里無爨者賊亦以
 是敗賊平且二十年矣其喘息育聚郡不過百之一縣
 不過千之一視楚為更慘毒余始不信及止溪先生之



李叙郡也書如蜀人言吁蜀道其難哉叙之爲郡去益千餘里北距冉駝徒笮南極嵩昆明自漢置郡通犍道以控百蠻而叙爲西徼要地傳曰令犍爲自葆就此其徵也夫去益絕遠而百蠻部落牙錯其地民卒徒隸數百人奉其長吏十餘人其欲宣威德墾艸闢土通商販如昔繁盛時抑又難矣今舅氏人遠辭其母夫人省觀于叙是役也君子以爲事親之難焉人遠旣鮮兄弟父在蜀而母在吳詩曰陟彼岵兮瞻望父兮此行之誠不能已者也詩曰陟彼屺兮瞻望母兮此行之又不得已者也若夫山川險阻道路遼闊寒暑暴露食宿饑凍跋涉之勞萑苻之警豺虎之虞人或以爲難人遠則奮前

而不顧者嘗聞入蜀之路二一遡大江以進三峽爲最近賊至今爲梗難行一從漢口抵陽平取道連雲棧爲紆仕宦商賈多繇之而人遠則截江踰淮渡河而北游燕薊西走黃花紫荆飛狐道中入關越隴出梓潼巴閬以南至叙也壯矣哉夫窮者達其言勞者歌其事行矣過都歷國流離喪亂千百十所存幾何而且西望吾父東望吾母其鬱于中而發于口必有以動人之感慨思慕非等流俗汎然游行之作者又聞荆蜀會師破賊峽江道通朝發白帝莫宿江陵昔難如彼今易若此人遠儻繇此道歸則趨庭旣畢倚閭旋悞且過楚而覽其土風民物知余言之不誣也

李繩遠 斯年

若夫蠶叢所開高懸白帝之成鼈靈所鑿直望烏蠻之
河梯峰不盡其危浮毛未窮其阻固地勢所難天險爲
最者也而朱子人遠以其嚴君止溪先生司法叙州於
是有省覲之役陳元方之色養昔見表于百城袁夏甫
之徒行非辭勞于千里且以嘉陵西斷巴水東迴湘纍
已行絃歌之祠猶見瑤姬一送雲雨之臺旣空百日縈
盤有黃牛之峽三朝往復卽黃龍之灘况其分襟六詔
遠帶雙峨青衣舊江朱提新穴交通邛笮之所逼居黎
熒之中而益部王尊不驚九折之坂成都廉范卽興五
袴之謠于公自無寃民齊臺豈其疑獄爾乃荊州遺絹

益勸其清高田禾在官自同于羈旅寧非至行及于三
君家風推于萬石者乎然而道里云遙梯航伊始嘉賓
集送祖帳連開零雨晨風如陟陽之亭候落花芳艸猶
南浦之泂沿遂挽空舲彌攀絕巘竹枝晚和長年蚤催
憐杜宇之遺聲豈無懷土引清猿之屢嘯誰不沾裳夫
懸雷名山恐違親而不去河梁岐路託離友以陳辭且
鴻鵠之高騫與關山而並遠別絃方促渝歌已聞餞酒
頻行巴鄉未醉巫陽秋樹相思十二之峰瞿峽春流幾
越千三之路

姪奇齡 與三

吾鄉十數里內星羅碁置皆族人也東爲花園里西曰

小桃源其里雖無穹巖峻谷飛泉恠石可以壯遊觀極
登眺而環以陂池延以林麓桑麻雜然歲時斗酒相勞
聚族而歌呼亦足自樂昔元至正末所在干戈紛起而
此獨晏然不知有兵革尚書貢玩齋先生奉命使浙嘗
隱居于此桃源之所繇名也家從祖岷左公家焉公瞻
詩古文辭不樂仕宦辛丑冬以徵辟之官叙州夫叙州
固多名山水自古騷人傑士皆樂從遊披其圖長寧縣
治之境相傳爲耕者得一銅牌遺詩其上亦曰小桃源
嗟乎夫丈夫數千里外爲天子安境治民河山風景頓
然改觀雖與幽居野伏老死甕牖者所樂不同至于世
路之荆棘人情之險詖以及風濤露之所歷崎嶇檉杙

當倍有憂于窮者今公歷西秦登棧道跋涉萬里而臨
叙州之治乃桃源之樂不改其故亦一快也夫以公之
高懷曠志遺聲利忘榮寵縱情于山水之間而托之詩
歌弔古而悲今吾知其不以富貴爲酣豢也則亦安往
而不得桃源哉而况乎其爲桃源也今年春叔氏人遠
將有省覲之役同人之長于詩者作爲篇章以志其行
其道里險易登臨馳驟之趣余不得而紀也叔之歸也
其爲吾圖山川之壯麗志風俗之淳澆紀鳥獸花木百
物奇怪之狀過任永之間而訪問其高風亮節倘有可
言者乎吾將洗耳而聽之矣故于其行也序之以言

李良年

武曾

我友朱子人遠之尊人止谿先生往以郡法曹得官蜀之叙州于是凡五歲矣人遠將以吉日命僕夫戒行李別其舊所游者而省于其治嘗聞古人贈處必以言于其行固有不能已者記曰子生設弧于門左三日射之蓋有四方之象自夫子與子貢論士亦先之以使四方不辱命至于宗族稱孝鄉黨稱弟卽爲士之次概可知矣然古人子之事其親也晨定而昏省冬溫而夏清自雞鳴盥櫛左右之所佩以至酒醴芼蕡渾潘修滫之屬無不竭力而身爲之則亦有不忍以四方之故而輕去其親者若夫親瘁于王事而子以孝行誠亦遭逢之不易矣人遠之游殆庶幾不悖于古乎我聞叙古捷爲之

地其民自改易以來凋瘵已極國家用前制以推府佐郡典刑詰蓋古者司理之任而故事會城按治凡爲其屬之理率赴會勘讞相更代以爲嘗惟其職嘗爲監司部使者之所諉寄故其制如此夫以巴蜀崎嶇險徧之隅而益之以重因此亦司訟獄者所哀矜而慎恤之秋矣人之有意于當世嘗患于不得爲至權足以爲矣而一切以法令鞭撻從事繇其術而不變亦世道之憂也先生出涖茲土繇其委任之專而本之以忠厚之思西南之民其有賴乎人遠俟其報最以歸必有以其家之治績爲予言者予旣以前所爲述叙君之遊而復申以君之所致望于親者亦將自附于贈言之義至于山川

道遠憑眺多有茲不列者重省親也

詩

張璠 魯山集唐

鯉也趨庭日添余別興牽忽聞歸舊縣復作遊西川雲
雨連三峽星河共一天至人無滯迹未必去經年

時燕歸未久

涼風動萬里說向欲行人蜀酒禁愁得江花入興新抽
毫贈篇什把臂見情真久客空旋旆高堂有老親
秀才何翩翩驅馬向秋天萬里瞿唐月千家橘柚川夜
郎溪日暖巴字水形連朝夕高堂念君來慟眼前

吳震 南村

疋馬瞻雲去海門河橋今日盡離尊路經郢國應調雪
舟入瞿唐莫聽猿夜雨青袍傷異地秋原白骨畏荒村
須知鯉也趨庭意天外承歡總故園
楓林搖落不勝愁送別臨高恰在秋詩酒多情雙白髮
干戈滿目一輕舟瀘江明月寒鄉夢巴峽西風薄客裘
鞍馬若經杜甫宅持觴爲我少遲留

姚邑侯樂臣先生夔

坐聽離群一雁驚鳳毛又綴舞衣行殊方易得思家淚
知己難爲送遠情江上奇峰當面出天邊匹馬入雲平
兼程蚤慰高堂望薄宦猶傳詩卷盈

峽樹巴雲入望青送君萬里獨揚舲嚴君執法開三面

才子趨庭受二經路折蠶叢山疊
江空灩澦水冥
承歡倘及家鄉事爲道余行問獨醒

鄧 璿 蓉洲

高館肅嚴駕張筵激清商携手萬里人戀
河之陽河陽一遠別風波凌茫
顧彼水中鳥燕婉雙鴛鴦交頸
相和鳴羽翼自成行奈何遠游子離合良不嘗寧親往
蜀郡行矣辭故鄉伊余忝兄弟慷慨情正長安得騁浮
雲與子共翱翔

查 容 韜荒

去年送君渡河北浮雲朔雁長相憶今年別我上瞿唐
嶺樹啼猿欲斷腸平生壯志輕萬里出門卹顧妻與子

何況老親久宦遊側身西望情難已江花十月焘征衣
片帆遠逐綵雲飛黃牛峽險回湍急白帝城空搗練稀
官舍蕭條復何有斑斕舞罷前爲壽席上初陳丙穴魚
杯中旋進郢筒酒自古嘗稱蜀道難誰知今日更平安
河橋可憐不相送巴江越嶠多愁夢巴渝一曲令人哀
石城東望幾徘徊余亦明年遊夢澤看汝江陵一日回

裴亮佐 稜菴

蜀道去悠
征帆不少留緣知瞻岵切不作五陵遊月
落江城暮猿啼峽樹秋行看銘劔閣名譽重西州

陳 昌 子榮

離亭霜落柳初殘此去無
蜀道難佐郡清風憐薄宦

趨庭綵服美承歡
帆移浙水斜陽遠
路入荆門旅夢寒
聞說那箇能醉客
川南應作故鄉看

釋通復 文可

西蜀千盤道東吳萬里船
趨庭心獨苦別母泪先懸
叩
熨蠻風雜岷峨瘴雨偏
男兒信有骨難負壯遊年
棧險秋冬際西來有問津
巴山元帶楚劔閣未離秦
迢遞驅行子艱難拜老親
郡樓花早發萊綵正宜春
盛氣親雄劔因深弔古哀
空山夏禹廟春艸越王臺
揚馬人何在乾坤眼獨開
登高能載筆好試大夫才
俞君初北道查子欲南征
亦變憂時髮猶豪痛飲名老
堅吾道約貧愛故人情筋力煩相慰
春山布襪輕

時右吉之晉韜荒將適黔人遠別時誠余勿輕遠涉

徐汾 京山

遊子趨庭去何愁
蜀道難開帆江上別立馬
峽中看花發三春曉
猿啼二月寒孟陽揮彩筆
劔閣在雲端

孫駿 彤侯

北風正蕭瑟之子欲孤征
祇爲寧親切何辭萬里行
楓迎驛路遠霜點客裘輕
此日銅梁上賢哉公子名

沈廷植 香谿

南國佳公子趨庭到蜀中
巫山迴地險劔閣與天通
短鬢隨霜艸秋心觸曉風
蠻雲連海日一爲惜征鴻
巖霜零水驛白艸亂金天重
把離亭酒遙看萬里船
秋

分巴樹直日落錦江圓父老驚初定相如檄早傳

查珪叔寶

劔閣重關險蠶叢萬嶂齊客愁何處是渺匕片帆低路
轉吳山盡江分楚塞迷此行真涉險惟有夜猿啼
萬里從茲別相於話苦辛嶺雲迷客路霜月焰征人故
國辭良友他鄉近老親一杯須盡醉切莫問家貧
匹馬錦城遊北風嘶未休孤征臨絕塞萬里動邊愁雁
引江沙夕霜含峽樹秋何當悲遠去臨別贈吳鈎
客路千鄉外蒼茫萬里秋山從天際合水向日邊流絕
塞黃雲斷孤城白髮愁離情不可極相送倍悠悠

陳元龍廣陵

之子趨庭日嚴君執法時蜀山堪入賦楚樹好題詩驛
路分霜劔風塵點鬢絲北堂竚望久行李莫遲匕
秋風正蕭颯偏爾獨西征漸聽殊方語難忘故國情錦
江歸雁影巫峽夜猿聲慎勿貪登陟艱難在此行

弟大年介山

萬里去依匕南天音問稀驪歌今夜酒客路隔年衣征
雁度復度啼鵲歸未歸莫將春艸夢化作峽雲飛

沈煜近垣

巴水巫山不易行送君萬里預期程秋風不管猿啼苦
夜匕吹愁到五更

勞匕亭畔雨霏匕木葉初殘南雁飛尊酒故人須盡醉

此行珍重老萊衣

陳萱 幼孜

將父何辭萬里遙
楓林霜月冷河橋
憑君匹馬青天外
劔閣重開試綵毫

南北東西客路愁
征帆計日是梁州
墟邊尚有如花女
君到臨邛莫浪遊

虞文彪 省菴

燭_匕參辰沒朝日
焰高丘之子奮長袂
慷慨萬里遊萬
里省嚴親軒駕何秋_匕
側身望蜀郡山川阻且修
仰觀巫峽長俯視巴水流
高下無窮極念君去悠_匕
余忝子同袍形往心常留
脫手欲有贈_匕爾雙吳鈞

扶桑閣集 卷五

日觀山人朱爾邁人遠篋

西瞻詩

詩有之陟彼岵兮瞻望父兮此西瞻所繇作也吾父

宦蜀荏苒五年游子去吳間關萬里惟時丹楓辭樹

白露零衣望雁衡陽聽猿巫峽窮水道之逶迤迤北

風而首路旣情同負米不避銅梁乃才異勒銘獨登

劔閣壯哉茲遊乎雖驪歌三疊折柳徒傷祖帳一尊

牽衣若失然而夜郎月落猶傳供奉酒狂白帝秋高

偏入拾遺詩史僕也不才心竊嚮往之久矣為紀篇

章以成帙一抒歲月之餘閑敢云腹裡車輪望長途

而輾轉正藉筆牀翡翠共綵服爲編爛云爾於其行
先一日得詩八首時歲在丙午孟冬則陽□□□之
月丁巳也

蜀遊八首

萬里從茲始。秋風動客吟。雲山連楚濶。瘴癘渡瀘深。不
斷他鄉目。長懸故國心。投鞭還竚立。楓葉氣蕭森。
疋馬錦城秋。長征一剌綫。徒然羞結客。豈敢說封侯。華
鬢催寒色。霜笳起夜愁。江空蒲柳變。泛泛愧輕鷗。
雪霽峨眉月。花明錦水春。五年吾父遠。拙宦有誰親。郡
僻容疎嬾。心閑足隱淪。拂衣天地外。那敢計長貧。
祖帳當岐路。良朋手自携。驪駒嘶月苦。鴻雁背霜低。天

濶書難寄。途長夢欲迷。秋風將別意。飛度夜郎西。
欲去難辭母。牽衣又病妻。朱顏花下改。白髮鏡中齊。霜
月從吳看。山鵲向蜀啼。男兒非惜別。攬筆不堪題。
且喜趨庭近。無傷作客違。耶筒承菽水。已舞進萊衣。宦
橐詩徒滿。山城吏亦稀。登高應極目。稗子正西歸。
路絕黃牛峽。城孤白帝天。昔人曾倚劔。吾道合鳴鞭。楚
樹尊前出。巫雲掌上懸。漫誇雄筆在。試濯錦江鮮。
天地留名勝。賢豪自古今。凌雲司馬賦。卜宅灤西吟。異
世如相待。高風未易尋。我來千載後。猶不負知音。
戊午海寧發舟拜北堂辭朋好遵河流而北五十里
抵石門宿得詩六首

辭母

作客三年久。燕還更蜀行。青袍虛落拓。白髮重經營。書問童孫讀。機寬嬾婦聲。臨岐多少淚。不止別離情。

別內用原韻

北風吹去馬。蕩子欲孤征。杯酒今宵別。星河異地明。天高低雁翼。峽斷續猿聲。慎爾深閨夢。關度錦城。

示兒輩

汝獨不見虎子生。三日氣可食牛糞。中出又不見鳳凰。丹穴羽毛成。高飛一舉凌蒼冥。丈夫隻身走萬里。短劍長弓白羽矢。翻七結束非徒然。出門那復顧妻子。我今飄泊敝貂裘。新書六上不見收。惘七辭家與汝別。臨岐

欲語還嗚咽。阿冲阿冲聽我歌。激楚汝今年紀已十五。

阿弟溥也。少二年一卷清文。頗國舉比肩。差長汝稱兄。

阿洵頭角已崢嶸。雖復多病粗識字。讀書惟汝相經營。

古人立言更立德。掇彼春華攬秋實。少年志氣無須更。

皎如初出扶桑日。試看汝父頭二毛。因人碌七等兒曹。

青雲長負庭闈念。白雪虛傳下里高。咄哉父書不可讀。

昔日垂髫今漸秃。東西南北無歸期。望汝區七徒舐犢。

吳震自黃山歸送余入蜀賦別二首

駿山驛路富春船。載得新詩向我傳。正值君歸我又別。

江花江草倍依然。

丹楓搖落白雲秋。巫峽啼猿處七愁不及君情千萬里。

相隨一直上渝州

石門

石門風氣肅晚泊畏初寒城壓秋花瘦霜欺木葉乾扣
舷容短鋏驅馬負長竿猶是鄉關月相依竟夕看

已未石門蚤發北風時起木葉撼已 有聲游子衣單
辭鄉增感抵南潯宿計程九十里得詩七首

留別陳禧并序

余自燕還未幾子文有鄴都之行越歲余避喧
兩峰間子文歸里寄我新詩相期握手不意八
月之半子文復走粵東余則遊蜀西矣歲月蹉
跎良朋雲散東西南北亂我羈愁

我自燕還君去吳大梁市上促驪駒夏雲飛旆移三竺
秋月隨帆下五湖香浦書沉天北雁錦江目斷日南珠
丹楓白荻愁難盡兩地相思夢有無

寄張璠許蛟陳昌

舴艋乘風萬里開良朋祖帳首重回劍分海外蛟龍窟
書阻江邊滌瀨堆明月夜懸霜葉亂征鴻寒逐戍雲哀
遙知別後懷人遠醉裡新詩仔細裁

期別不至 二首

吳雲峽樹望依七十月霜寒未授衣無數征鴻天外落
可憐不向玉窓飛

相訂河橋話別離青驄為爾駐金羈如何袖裡瑤華字

化作巫雲入夢遲

南潯二首

獨客停橈晚楓林不可聞
浮來震澤水遙隔禦兒雲
綠汎盈尊酒紅拖著地裙
旅魂仍自笑飄泊負耕耘
萬井烟初合千門月裡開
霜黃肥蟹甲水白漲魚腮
篷短秋心折裘寒劒影猜
鄉書題不盡歸雁莫頻催

月

一艇乘風事遠遊白雲天半幾遲留
梅花箔上明七月倚徧高堂萬里愁

庚申自南潯過東阡故相園亭霜寒木落
亭午到湖州越隱龍橋白棟丹楓依七渚
叙一似助余愁思者

宿紅心橋下計程一百三十里得詩四首

東阡

月黑霜明雁影斜東阡古渡咽寒笳
鴛鴦瓦坼芙蓉盡猶說當年宰相家

茗書道上

清川一何曠散髮弄輕舟我行方萬里
浩然此中流微茫越烟淑出沒隨沙鷗
天氣颯已爽寒潦澄高秋昔聞張志和
披簑把釣鈎愛此溪色美浮家任去留
斯人今則已我來誰與儔沿源獨西去
流水心悠悠

西吳雜述二首

西施從此入宮初雪膾銀絲到玉厨
紅槳輕搖綠衣女

至今猶賣膾殘魚

膾殘魚俗呼銀魚相傳西施時傾殘膾而成苔
雪間產此獨多

招提古壁画蒼筠女史長留翰墨新風雨至今飛白晝
令人憶殺管夫人

天聖寺兩壁間有趙子昂夫人管仲姬墨竹

辛酉雨發達泗安鎮計程五十六里得詩二首

雨舟寄荅查容期明年八月俟我瀟湘

綠樹灣頭夜停午紅心橋下老蛟怒一葉隨波客獨眠
烏啼月黑來風雨風雨凄凄不可聞南湖秋色倍思君
君期八月瀟湘水我向三冬巫峽雲各自東西南北路
丈夫蹤跡真如鶩懷中寶氣上千霄抽毫且作相如賦

相如下宅舊成都余亦携琴問酒鑪卓家尚有如花女
載得扁舟下五湖楚姬歌蜀姬舞七罷彈君白雪聲醉
向江洲弔鸚鵡

泗安題壁

秋風吹客到寒塘楓葉初殘野菊黃明日馬蹄千萬里
泗安回首是吾鄉

壬戌望泗安策馬石路纖折難行出蕪湖孔道兩際
青山犬牙互錯陵者種松隰者植稻什不下二三浸
爲溪田農庄碁置皆如其木之曲直成之編荆爲門
束茆作蓋其民樸風土固殊也抵廣德州七春秋屬
吳名桐汭秦爲鄣郡今稱故鄣云緣城西走仰詫雉

堞雲連有父老進曰初自某令之蒞茲土也歛民財
成之至今婦子呻吟之聲不絕悲夫是日越嶺十有
三計程五十里得詩二首

泗安馬上口占

從此辭鄉國輕裝出亂山日微楓葉瘦路仄馬蹄慳鬚
騁留孤影風雲失壯顏男兒行萬里豈必問刀鏹

桐汭尋張志和釣魚臺

水分溪鷺白山逼樹鷗青疑是垂竿處僕夫不肯停城
陰浮遠棹野色帶疎星笑我臨流意魚寒月滿汀

癸亥月下行所過松林柏塢桐栗間之經山嶺者十
三渡溪水者二至誓節渡捫碑爲唐末乾符六年黃

巢倡亂敗走江東轉掠饒信池宣歙十五州其時有
張公者不知何許人率衆拒于溪澣死焉後人因爲
立廟復踰十一嶺經百花橋入宣城境又歷嶺者五
渡一水爲洪林橋宿計程一百二十里得詩四首

故鄣曉騎

明月焰霜蹄衝風問路西林荒深臥鹿天白遠聞雞客
影分珠勒鄉心限玉溪轆轤三尺劔看吐氣如霓

廣德州城臨玉溪

馬上聞画簷二首

烏柏飄殘苦竹黃画簷聲裡客愁長山村少婦偏知豔
苧帳初開試曉妝

披荆閣集 卷五
客路風光故苑同流聲宛轉入簾櫳最憐遊子天涯淚
不灑深閨紅粉中

題誓節渡張公祠

月黑烏啼嶺頭樹紛々落葉零秋露塞驢西向客衣單
燈火遙分誓節渡々荒古碣委蒼烟猶帶張公戰血鮮
一死一生臣節見那留名字炤遺編可惜遺編不在手
漫賦長歌傾濁酒々盡歌長天地寒對君再拜君知否
甲子自洪林行經嶺者九繞溪流逶迤而西僕夫爲
余遙指敬亭山翠黛欲滴白雲帶之渡雙橋卽太白
詩雙橋落彩虹處也又過東溪橋々下溪泉清駛魚
遊若空北爲寧國府東門計程六十里入茆店僕夫
告瘁矣于是舍騎徒步從衛城里而下尋謝公北樓
里人無一知者或曰城之北樓也碑記俱無可考或
曰蓋在府治云左折而東拜文文山先生祠頗零落
猶勒正氣歌于門屏間歸寓喜逢涇邑人問桃花潭
近况夜分假寐一人披鹿裘幅巾藜杖執一卷詩謂
余曰僕李白也遺集授汝欲展卷已糊々然覺矣嗟
乎太白以蜀人流寓姑孰卒塋青山山去此百里
豈魂魄猶來往敬亭耶得詩五首

宛溪口占

搖落西風白氎巾霜花十月似殘春宛溪一帶清于鏡
偏炤長途憔悴人

望敬亭山弔李供奉

問舊來山郭尋幽識敬亭古人看不厭今日眼逾青詩
酒辜明月松楸暗謫星悠々行路側愧爾共飄零

登宣城北樓懷謝公

宛陵木落敬亭秋獨我題詩到北樓檻外白雲碑蘚沒
杯中明月戍烟收江連吳楚分鄉夢天入巴渝動客愁
千載登臨慚李白驚人佳句想風流

謁文文山先生祠

正氣留天地荒祠到古今爲存國體重莫問主恩深風
雨雕甍剝藤蘿石碣侵湯匕宛溪水留炤百年心
從人詢桃花潭處

乘舟李白賞知音送客當時一片心此日桃花潭上路
不知若個最情深

乙丑緣寧國城而西越十二嶺至寒亭復陟二嶺渡
清弋江一望澄波委練淵無潛石右折林樾委蛇人
家樸略到南陵縣之東關南陵古春穀城也宿茅店
計程一百里得詩二首

宛陵道中

野店縈山曲溪田繞路長麥苗肥細雨菜甲飽濃霜馬
老親孤客天寒畏異鄉從人且稅駕嬾與說行藏

題霜稜花

并序

花生道旁色似青蓮余怪其弱質獨稜然霜露

下也以詩寵之

籬菊飄零野竹摧稜然獨爾向霜栽紫莖翠帶非容易
珍重風前莫亂開

丙寅春穀城蚤行山峪盤紆溪田參錯越八嶺渡三
溪至九龍廟入銅陵縣境復上下山嶺者九兩岍楓
林箴七馬蹄從亂山中束步難行暮達順安鎮計程
一百二十里得詩二首

春穀城早行

春穀城頭月如練西風獵七吹人面野店聞雞整馬鞭
霜明路滑匆七飯天涯遊子去年七蜀樹吳雲望黯然
嚴親未解東山組老母仍炊栗里烟東西異地違顏色

一家三處長相憶夢來滄海楓林青吹斷峨眉秋雪白
雪白楓青萬里同尋親豈敢歎途窮鄉書馬上題難盡
珍重微軀慰去鴻

銅陵道上

銅陵最下邑蹊峪互勾連土薄營薑塢泉香熟芋田牧
童癯似鶴浣女弱於綿問俗頻驚顧垂鞭一憮然
丁卯策騎盤旋蹊峪間越嶺者十九至大洋鎮遇當
壚余姬烹鳧進酒止余馬痛飲因酬以詩題壁而去
抵大通驛始見大江迴抱吳山東盡楚樹西連僕七
勞人心目絕曠計程六十里得詩三首

題大洋旅壁二首

大洋女兒三十強，纖手提壺勸客嘗。肯與壚頭相對飲，
爲君打起雙鴛鴦。
鴛鴦在塘酒滿壺，君但能留不用沽。恠殺馬蹄催去速，
倚鞭伴自罵兒夫。

大通驛遠望

疋馬川原別敝裘，風露寒只愁憔悴。色難向老親看江，
闊帆飄泊山長路。鬱盤白雲愁處，何日到承歡。
戊辰大通候風寓艾氏得詩四首

次壁間韻

四首

江畔傷心處，花開十月春。天涯多少夢，難慰白頭人。
北風吹雁斷，誰寄隴頭春。日七江樓上，蕭七愁殺人。

飄泊他鄉淚，遲迴故國春。最憐永夜月，腸斷倚樓人。
峽樹愁猿暮，江城啼鳥春。十年百不遂，萬里一勞人。
己巳喜遇吾鄉茗上諸客相訂同舟得詩二首

贈同舟諸公

二首

我住滄溟海，君家苕霅溪。共憐吳樹隔，却遇楚雲西。聯
袂披秋月，隨帆渡曉雞。天涯知己在，莫惜醉如泥。
客裏歌三疊，江邊酒一壺。因之敦古道，兼以托微軀。氣
接延津劍，光分合浦珠。浮沉生計拙，悔作十年儒。

庚午雨坐寓樓，適念南湖可。公將北遊雲中數年之
內，同人零散如斯年去。滇子直適，薊雀江遊，梁韜荒
亦且理瀟湘之權，而余則遡大江，凌濫瀕，飄泊萬里。

直抵戎州回首同群東西南北停雲落月如何可云
得詩五首

遙送復上人遊大同

四首

朔漠風何厲愁君客路賒背鴻馳馬邑犯雪渡龍沙薄
醉詩垂草隆寒鬣作花遙知萬里隔鄉思引悲笳
我亦天南去君偏塞北行尺書垂袖短旅橐負瓢輕風
急飛狐斷烟橫涿鹿平天涯俱是客辛苦別離情
逢迎知有舊投轡好論文衲擁壺關雪尊邀恒岳雲戍
閑清嘯合沙瘠旅顏分看到秦時月翻匕興不群
渾源溯自遠蜀道上尤難水闊孤鴻度天高一騎看風
塵欺短褐邊塞負長竿何日歸來好南湖歲月寬

遠遊歌

鶴江傲骨何嶙峋詩成落紙驚鬼神大梁市上行逡巡
賣漿屠狗恣天真謀食不無蒙世嗔盛遠子宣翻匕喜結
客對人青眼時迴白說劍經過燕趙北高歌縱酒吐胸
臆何人為汝借顏色營趙斯年昨歲登孤舟碧雞金馬久
淹留玉轡寶劍雙吳鉤雄心直欲取封侯脫手相贈誰
能收李繩遠可公白髮飄灑匕爾亦胡為走曠野雁門關
前白樓下矍鑠猶騎驃裏馬新詩滿篋自傾瀉復上人韜
荒計日下瀟湘黃鶴樓開白羽觴大堤女兒歌聲長奏
汝陽春繞屋梁悠哉樂事殊未央查容我獨飄零大江走
短鋏長鑱日在手巫雲峽雨三巴口篋中空問蛟龍吼

東西南北長回首

辛未大通驛上船出梅根卽齊武帝估客樂昔經樊
鄧役阻潮梅根渚是也庾信枯樹賦亦有南陵以梅
根作冶從此越蓮子港盤流波磯泊清溪宿九域志
池州貴池縣有清溪鎮盛約記云清溪南來九華東
引洪流環繞沃野彌望李白秋浦歌清溪非隴水翻
作斷腸流卽此計程六十里得詩二首

江帆蚤發

空闊長江路波濤送客來沙黃捲霧起風白漲帆開深
窟蛟龍狎危灘雁鷺猜古人親在日涉險重徘徊

清溪聞雁

客愁萬里是巴西苦荻寒蘆雁影低倘到故園老母問
爲言我已過清溪

壬申從池口驛走大江池口五代貴池地源出石埭
縣之櫟山昭明以其魚美故名過宗陽口西望太子
磯屹立烟水中恠石林立江流激蕩憂然有聲上有
廟相傳羅刹太子故蹟或曰從昭明名至李陽驛經
攔江磯也不甚高上俱石峰聳起出沒水面如嶠故
往來諸舟俱避此北走繇長風沙至安慶府池州志
雁汊下八十里名長風沙太白長干行早晚下三巴
直至長風沙梅聖俞詩長風沙浪屋許大羅刹石齒
水下排卽此南上出亂柴夾抵黃石磯宿水經注一

名石茨圻昔寧王之亂率兵至此因不利返兵蓋方
言石字叶失悞爲王失機故耳計程二百里得詩四
首

池州過太子磯

靈風毒霧暗朝暉何處浮來太子磯江轉池陽吳樹隔
天連雲夢楚山微老蛟拂影侵孤劔征雁流聲度短衣
恠殺寒汀枯柳盡年已送客不曾歸

題攔江磯

攔江磯邊濁流水攔江磯上石齒已客子乘風冒險行
扁舟獨上直于矢爲汝高澆酒一觴危峰何勿亘天長
攔盡江南江北路不使行人枉斷腸


望皖城

北風吹浪急皖國渡間關城迥懸孤塔江空出亂山風
檣賈舶遠燈火戍樓閑笑殺長征者蒼髭鬢乍斑

黃石磯夜泊

黃石迴磯險征篷獨夜愁沙虛侵月動江闊帶星流天
地留青眼詩書誤白頭薄寒難得寐細已促更籌

癸酉蟠蓮花洲出東流縣循江而北繇雷港驛花揚
鎮磨盤洲雞公嘴西上以避馬當之險馬當山屬豫
章彭澤縣橫枕大江昔陸魯望嘗謂天下之險在山
曰太行在水曰呂梁合二險而爲一吾又聞乎馬當
過小孤山屹立江中高可百丈四面斗絕惟南岬可



原件短缺

登與對江澎浪磯並峙俱峭壁巉岳列如門戶上有
神女廟或曰安濟夫人也土人輒稱小姑宋人有詩
舟中估客莫漫狂小姑前年嫁彭郎蓋彭郎卽澎浪
也西南可望彭澤石城如彈丸隱七山半相傳有五
柳館爲陶公故居尚存下鱗魚嘴復溯江南岍從柘
磯轉入八里江與湖口縣相對遙見匡廬插雲積翠
空濛與天無際登岍又望彭蠡之勝彭蠡俗稱鄱陽
湖流澎湃中有山巋然卽大孤也較小孤略低而廣
則過之亦呼鞋山前朝景王曾有鞋山詩聞嚴冬水
落山址可通杖履云計程二百四十里得詩七首

馬當歌二首

南記江自湖口分一支爲南江卽江西路也江水渾
濁惟南江獨清不相亂至下迴風磯白石齒七與江
流相蕩激舟子牽百丈行斷續者再無何遇順風行
十餘里過硯瓦洲風復轉而西盤二磯出白水港達
九江府七城西北臨大江卽潯陽湓浦間也蓋大江
自此分爲九道故名前志沅漸澧辰叙西湘資水皆
合洞庭中東入于江始于鄂陵終于江口會于宿松
之桑落洲潯陽地志烏白江蟬江烏江嘉靡江畎江
源江廩江提江箇江是爲九江昔王右丞詩楚塞三
湘接荆門九派通皇甫冉詩江至潯陽九派分築石
成塘結茅爲宇烟火數十里相望爲襟帶上流云泊

龍湖宿計程六十里得詩二首

溯下迴風磯作

洞庭木落兮楚雲低蘆荻荒兮艸迷離雁南歸兮人去遡北風兮心悲悽汝何人兮到此兮何時兮行路嶮巖嗚呼嶮巖兮唯太行與孟門今復見兮迴風之磯

後琵琶行

并序

昔白傅作江州司馬送客湓浦口夜半聞隣舫老妓奏琵琶聲情悽切爰賦琵琶行以寫之余才不逮古人適泊舟於此時天寒木落北風吹雨獵獵不止同舟有韋郎者自言當時平康之勝迄今十年故妓零落僅一人而已於是援筆

爲後琵琶行書二紙一貯篋中一投江水俾好事者審聲可以知變云

鴻雁南飛風撼兮邊笳吹起霜華白孤篷短楫爾何來
七尺徒然稱落魄潯陽江上問娼家誰似當初桃李花
翡翠窓寒鳴蟋蟀芙蓉帳捲歇琵琶琵琶不解朱顏誤
中夜彈來淚無數請君且勿聽琵琶長歌一曲留君住
憶昔春風俠少年石榴裙拂珊瑚鞭朝兮結伴花如錦
夜兮傾歡酒似川公子西園心乍許佳人南國來楚兮
曼聲促柱按伊州雙手調絃雜羞鼓漫言小妹鬪輕綃
更有隣姬逞細腰連理香從被底贈合歡勝自夢中邀
夢中私語巫山浦被底嬌羞鄂江渚起來響遏行雲歌

妝罷窓臨垂手舞歌舞年七上翠樓珠簾繡幕黃金鈎
灼七蓮花銀鑄履亭七鷓鬢玉搔頭豈惜柔情傳指法
輕移紅袖舒纖甲帶月低回引鷓鴣迎風宛轉飛蝴蝶
蝴蝶誰禁芳樹秋鷓鴣無那白雲愁忽來烽火吹江甸
浪把容顏逐水流東家小妹隨行伍蹴錦烏鞞馬上坐
遷揄春暖酪漿濃簫築風寒雲髻墮隣姬亦去嫁商人
江上秋風怨白蘋今朝雲雨迷三楚明日波濤下八閩
東西南北空延佇舊愁未散新歡舉玉窓仍見画舂人
鳳臺更遇吹簫侶我獨飄零兩鬢霜開奩懶整舊時妝
盛衰轉眼浮萍去湓浦相逢枉斷腸爲此琵琶向君擲
人間歲月真堪惜江州司馬若重來依舊青衫淚痕濕

乙亥風雨作不行得詩一首

龍湖守風漫感

萬里趨庭客望孤楚雲蜀樹到崎嶇瞿塘淚落猿多少
彭蠡書沉雁有無皂帽隨風摧短髮布帆帶月擁微軀
高堂應倚天涯望雙袖龍鍾若箇扶

丙子晦出官牌夾循楊口桃口過富池驛盤江而北
至龍坪忽有神鳥翩七集篷上榜人以脯投之鳥輒
從手中就食相傳吳大帝沒後衆兵所化亦猶蜀之
杜宇也一望臨江諸山參差出沒空翠逼人蜿蜒數
十里間映帶如画泊鄔家穴宿屬湖廣興國州境計
程一百二十里得詩二首

江口夜泊 二首

魚米熟江鄉人家接路長鳴榔開霧白刈稻入雲黃風
俗安時業逢迎笑客裝三分吳業在指點說興亡
桂槳玉欄干舟從画裏看江懸巫雨動山削楚風寒鄉
夢飛千里秋心付一竿夜闌神女佩疑下碧雲端
仲冬月在室辜□□丁丑朔出蟠塘榜人牽纜行兩
岍俱高山復嶺江流曲折如衣帶泊田家鎮升眺清
遠觸岫延賞把盞留連情不極已也計程四十里得
詩六首

江船漫興 四首

蜿蜒江流帶折嗟峨山翠屏開客影披裘獨臥權聲弄

月徐來

得食烏鷄群噪窺魚白鷺低飛有客有客作客曰歸曰
歸未歸

舟迴桃口楊口夢繞大孤小孤縹緲楚臺神女飄零越
國大夫

邴得半間石屋兼移百尺茅亭雨掛散花洲白晴開跨
鶴峰青

寄查雍揚度時雍留燕度還吳

浪遊南北重依然燕雁差池去各天君自多才逢世棄
我寧折節受人憐遊燕莫計黃金盡歸趙猶看白璧全
記得臨岐傾斗酒壯心一片拂龍泉

懷鄧璿湖上新居酒徒謂汪光被陸埜周禹也
聞君卜宅近城東曲几明窓結構工幔捲秋田莢艸綠
牀開夏屋藕花紅樓頭作賦飄緗帙月下浮尊繫玉驄
獨我天涯分手去酒徒若個最稱雄

戊寅遡江南上盤危磯而西磯石橫啣江潁高下十
餘丈如裂氷摧刃峻嶒北向出黃商口暗磯連綿因
渡江北走抵蘄州石城崱起江上烟火萬家牽百丈
循沙洲行南岸到茅山港九里之內阻危磯者十三
泊舟漁陽口有戒心計程七十里得詩二首

過蘄州賦得江城如画裏

江城如画裏蘄水接長隄艸白依寒鷺烟靑亂曉雞金

尊分月小錦纜蹴天低過客重回首蒼々獨向西

泊漁陽口

浩蕩漁陽口孤舟不易行迴風侵燭暗激水撼沙明山
逼雲疑雨江空盜是兵莫言客夢穩辛苦戒嚴更

已卯蚤發上道士泐相傳真武始得道於此兩山迴
抱下臨江水修篁叢木之間古殿隱々人影烟光望
若天際北崖峭壁萬尋藤蘿俱絕雪飛濤立駭目洞
心從此溯江而北經散花洲初公瑾破曹兵醜酒散
花勞軍洲上卽此至上迴風磯比下磯更險頑石橫
亘江水中激流洶々洞涵不定諸舟俱從石罅中牽
挽而上不敢外走防傾瀉也抵蘄水縣之蘭溪驛宿

計程九十里得詩六首

遙寄查甥珪 二首并序

珪余姨子也乃公石鳧屬余潘楊之好負雋才
倜儻以志節自厲少亡亡數月而珪生字叔寶
母氏含冰茹蘖董之成人一時以為湛母復生
艾年擇配吾友子山女冰清玉潤又足相當今
日適屆結褵余走四方不及把酒稱慶遙贈以

詩

吾甥今衛玠玉潤亦相當喜得雙星會遙知百兩將合
歡披寶帳連理促金觴廿載劬勞意從茲慰北堂
汝父平生志都從憂患餘未成栗里傳曾擬漆園書遠

大深懷璞艱難重倚閭勗哉惟愛日蒲柳異時疎

經道士泐

千尺孤峰百尺亭江流晴倚石門青何年聞道初留訣
此日尋真欲授經龜引泉虛依靜息鶴歸松老護疎翎
笑誇我亦餐霞客賦有凌雲接翠駟

過上迴風磯

君不見迴風之磯水傾瀉奔流激石風灑匕大者如象
小者馬百丈橫牽上復下客子許身羞苟且蛟龍躍起
胡為者手中寶劍光盈把有玉誰能辨真假嗚呼噫悲
哉有玉誰能辨真假

蘭溪驛見新月 二首

錦江月影掛如鈎，萬里間關並峽流。
帶得啼猿多少淚，蘭溪驛裏照孤舟。

吳楚三千路較長，隨風幾日下錢塘。
愁心不敢憑君寄，斷續鄉書千萬行。

庚辰出蘭溪，迺巴水驛西上。南望武昌縣，石城高峙枕江面。山與黃州相迤對，樊口江迴南樓烟。渺遙想當年，庾亮蘓軾諸公一觴一咏之樂。後竟無繼起者。城下見沙嶼，隱起爲子胥蘆洲。惜今時無漁父其人，與余倚歌而弔之。到黃州，遠眺赤壁，以風急不能泊舟。繇三江口歷團風鎮，宿雙流夾，計程一百八十里。得詩四首。

望武昌縣懷古

獨客傷心問霸圖，扣舷南望說樊湖。
誰憐庾亮樓頭月，猶照孫權城上烏。
霜荻夜明寒籟築，江天風白醉攪瑜。
興亡今古空流水，閉殺灘頭舊釣徒。

蘆洲弔伍大夫 二首

夕陽江上寒，新月洲前起。不見蘆中人，蒼々沒烟水。
新月吐危浦，夕陽迷遠津。卽今有漁父，誰是蘆中人。

黃州望赤壁戲占

有客有客今酒徒，風濤相送出菰蘆。
開尊不來臨臯鶴，舉網能似松江鱸。
白露橫舟懷渺々，蒼天倚月歌嗚々。
千秋作賦尋嘗事，何獨當時讓大蘇。

辛巳過黃岡之陽邏驛出五洞口遡江南上遙望武昌漢陽二郡相雄峙倚山爲城憑江設險實居吳楚津要焉計程八十里到漢口漢口在大別山之北漢水與滙水合流入江處車舟輻輳凡秦蜀黔豫吳粵諸富商大賈畢集於此遇吾鄉施君主其家得詩二首

望黃鶴樓二首

何年黃鶴去此地尚名樓目送烟波色茫茫鸚鵡洲鄉關千里隔吳楚一尊浮未試江城笛梅花落滿頭便欲攀躋上虛空百尺遙披襟弄秋月散髮臥雲霄醉眼橫江出浮生帶雁飄只疑天路近何必問王喬

壬午擬渡江而東適遇遼左八閩諸公相訂覓川船未及也遊興姑俟諸明日燈下得詩四首

漢口旅舍四首

羸馬孤篷歎路岐雲山萬里客行遲漢流尚與江流合邨使人間輕別離
客辭東海路綿亘西望峨眉更六千最是多情天上月清光三處照人圓
大別山高雁影寒客行且喜得粗安何繇繫足將書去報與高堂月下看
漢陽雲樹武昌樓三楚風光一望收鸚鵡已沉黃鶴去至今玉笛使人愁

癸未問渡漢陽入鐵門關迤東梯岬躡磴而上倚晴
川閣遠望瀟湘烟濤萬頃中日月吐納與天無盡誠
曠觀也西爲大禹廟今就頽門扁不得入廡下捫古
碑摹得十九句七十七字曰承帝曰咨翼輔佐卿洲
渚與登鳥獸之門參身洪流而明發爾興久旅忘家
宿嶽麓庭智營形折心罔弗辰往來平定華嶽泰衡
宗疏事衷勞餘伸禋鬱塞昏徙南瀆衍亭衣制食備
萬國其寧竄舞永奔相傳禹過衡時作此以紀治水
之事者舊藏南嶽岫嶠山頂岫嶠山高萬八千丈人
跡罕至宋何賢良爲一樵者引上碎紙摹歸後復裹
糧越嶮而登冀再遇焉竟不可得矣南下復上大別
山左爲沔口沔左有却月城亦曰偃月壘按志大別
一名魯山土人呼爲龜山且以對江之黃鵠磯爲蛇
山不知何據山上無亭榭竹木梵宇數間亦屬新創
繞麓僅古塚纍纍耳所喜者江漢瀆沔歷纒在目尚
欲跨江而東再尋武昌諸勝從者饑遂返寓得詩四
首

登晴川閣望黃鵠樓題壁 二首

晴川高閣百層開吳楚烟光擁客盃水白雲從天外盡
沙黃鶴白日邊來田園寧入他鄉夢書劒長懸故國哀
向晚狂歌調郢雪真疑落盡笛中梅

崔顥題詩在眼前至今樓閣記晴川千秋筆墨成佳話

獨我登臨繼昔賢山倚鳳皇雲歷歷艸空鸚鵡水年
應知來者還如昨浪使狂名此地傳

禹廟讀杜工部詩

江漢澄清日躬親疏鑿年樽櫨開大地圭瓚肅重玄壁
暗龍蛇動沙虛風雨懸少陵題句在好任後生傳

登大別山

飄泊來吳地登臨近楚天烏移雲夢樹帆掛洞庭烟無
復逢神女何從問謫仙滔江漢合不盡客愁懸

甲申天雨同人出扇頭盈案屈首作老書傭半日已
而頃斗酒烹鮮鱗携楚姬么么珊么歌舞遽進因笑
曰今日卽未臨黃鶴差足自慰得詩二首

座客挾妓倚歌詩以調之

檀板瓊簫靜夜聞細腰輕倚石榴裙鶯燕留情處
落盡巫山片雲

酬趙燦招飲

我本吳趨客行歌作楚狂何來雞黍饌偏止接輿旁投
分無時調相思卽故鄉明年秋水漲尋爾下瀟湘

乙酉雨霽問渡武昌時風激浪湧狎蛟龍際魚鼈非
復人間世也風稍息達黃鵠磯下石壁丈許皆直裂
相傳舊有仙人隱其中後化爲石太白詩頗聞列仙
人于此學飛術一朝向蓬海千載空石室東坡亦有
詩紀其事爲禹功磯土人呼呂公磯誤也從此進漢

陽門北走爲黃鶴樓雄峙高冠山之首亘起城隅檐
三層窓分八面高數百丈甫到門扁不得上因循樓
而東古石岫然立墻中隱見湧月臺三字不記歲
月相傳爲曹孟德書蓋乘月下荊州時也不數武有
碑紀崔左司黃鶴樓詩東上曰石鏡亭昔有石其光
如鏡鬚髮畢照後一道士坐其下歲餘遁去石竟無
光好事者因亭焉今此石亦不復存矣再上見平臺
數畝許頗爽塏東西繚垣旁植桃棗數十株中一棗
甚巨鐵幹斑剝半榮半枯遠望如石笋插雲霧間捫
碑爲白雲閣故址創自萬曆時某公隨興隨廢鞠爲
茂艸悲夫入小門歷堦而升爲仙棗亭按舊志武昌

黃鶴山故有棗數株千餘年不實一日結實如瓜人
竊食之仙去遂名其亭道士謂余曰頃所見老棗尚
其遺植也亭三楹列純陽遺像一臥者一執拂者一
吹鐵笛者道士又謂黃鵠磯下有呂公賣桃跡故樓
亦因呂公名余曰不然黃鶴故事或謂王子安或謂
費文禕至元人宋民望作碑始盡歸諸呂公夫樓之
創始誠不可稽姑以崔顥之詩論之崔爲開元人呂
以麟德時得道在崔詩已有昔人之稱則非呂也明
甚遂登樓眺矚西極巴蜀南際滇黔北窮秦豫東辨
吳粵滔七汨七萬里一瞬心更壯之因問鸚鵡洲道
士曰茲洲之沉也久矣惟窮冬水涸或一見之但白

沙磴也。更無所爲。禰生墓也。嗚呼。禰生當東漢之末。僅以一布衣傲睨群雄。間把酒屬賦。不加點竄。輒落筆千言。竟以鸚鵡名其洲。流傳於後。豈不偉歟。乃才高世忌。卒以見殺。卽尺土荒洲。尚不能保。致令覽古者。徒留連於烟波浩淼之區。酌酒無地。良可哀已。太白詩至今。芳洲上蘭蕙不敢生。豈非古今同慨。得詩五首。

冒雨渡武昌江

不涉風濤險。誰知天地寬。此生憑一葉。行路信稱難。雲白鳳皇曉。沙青鸚鵡寒。平生慷慨志。都付此中看。

題湧月臺

君不見老瞞當年乘月下。荆州舳艫千里蔽江浮。乘勝略定三江。水江水黯也。顏不流。橫槊凌虛上空壁。醉呼斗酒試雄筆。蛟龍天矯雲亂飛。湧月名臺勒片石。此時英風迥不群。霸圖千古說三分。豎儒禰生揖黃祖。落筆趨群何足云。至今江上猶聞戰月湧。江心白如練。直照西陵松栢間。銅雀孤飛人不見。

登黃鶴樓

高樓雄溯大江連。獨客趨庭到楚天。夏口風濤千舸合。漢陽烟雨萬家懸。狂名欲掛乾坤外。醉眼平臨翼軫前。不是鄉關愁處也。白雲兩地重依然。

尋鸚鵡洲弔禰生二首

江上一盃酒來尋鸚鵡洲
白雲隨日暮風雨愁無數
不見禰生來滄江去如故
丙戌龍巖賴子舟次招飲
醉歸復爲同人張樂壯我
行色酒半么匕起舞珊匕
奏歌卽席分贈得詩二首

贈妓二首

楚姬年十五生小字么匕
桃葉分嬌面楊枝蹴細腰
雪流歌扇薄雲帶舞衣
遙恍惚秦樓上全身駕鳳簫
昔聞珠瑟匕今喚玉珊匕
自足留春住何曾知夜寒倚
聲低落燕作態拂驚鸞
愧我非交甫真從漢水看
丁亥從漢口之薛家嘴入川船
同里諸公握手臨岐
殊難爲情也得詩二首

黃鶴樓別同里故人兼示二姬二首

扁舟十月上瞿塘楚樹巴雲
淚幾行黃鶴樓邊俱是客
笛聲吹斷故人腸

歌舞連宵話阿儂從今風雨
去匆匕大隄少女空城酒
倚徧雲端十二重

戊子發舟風阻漢陽城下登陸
循柳堤行柳堤爲大禹治水
時所築蓋漢水合江滙於大別
山下水勢迅激作此障之後人
因植柳夾岍也重登晴川閣
南下瞻大禹廟匕中合祀名康公
云得詩三首

重登晴川閣

閣外登臨迥天邊客路長
心傷仍異國目斷更吾鄉
倚

扶桑閣集 卷五
棹迴江漢憑軒落鳳凰
迥帆明日遠烟月望蒼
七

望黃鶴樓話別 二首

漢陽雲樹倚晴川
黃鶴樓頭望黯然
我向夜郎明月滿
思君飛不到尊前
片帆西上是渝州
為爾遲迴十日留
可奈風濤催去速
白雲狼藉不禁愁

扶桑閣集卷五終

扶桑閣集 卷六

日觀山人朱爾邁人遠簷

西瞻詩 二

已丑辭黃鶴而南十餘里泊舟澄江飛練明月鑒帷
如與故人語也得詩二首

江臯月下 二首

黃鶴樓西漢水濱
木蘭舟擁月華新
最憐永夜光于玉
不見當時解佩人

吳門樹斷楚雲懸
蜀道真成萬里天
只有月明隨客遠
北風吹上洞庭船

庚寅順風揚帆自鮎魚口出金沙洲直上大均山
七

下磯石譎起如波湧鱗比與金口驛對峙焉薄暮至
下沙口漁燈水市遙辨江村雖月影朦朧而異鄉兄
弟斗酒論心亦稱客途良遇計程八十里得詩二首

望金口驛

人烟開驛路浦樹出江村風闊灘聲激山孤塏勢尊有
身淹歲月無計託乾坤飄泊西南去羈愁不可論

沙口夜泊同龍巖諸公分賦

扁舟西去楚江寒百尺驚濤天際看霜月夜懸蓬鬢短
酒鑪煖趁客衣單延津龍氣臨風合巫峽猿啼入夢殘
長鋏莫愁行役遠異鄉兄弟聚應難

辛卯望下沙口行自白人磯東江腦出新灘口至下

箴洲七橫枕江滸形如滿月烟火數千家蒨牧與江
漁各半計程六十里得詩四首夜半風作凜冽動人
啟明視之已雪深徑尺矣

下箴洲卽事

四首

南國扁舟遠北風布帽寒可憐雙雁影不畏客途難
茅屋人家古漁罾晚渡閑烟波與客意澹蕩不知還
水落沙痕白江澄日氣黃健兒一箭起兩匕墜鴛鴦
客久心如搗途寒夜似年吳鈞光爛熳空向篋中懸
壬辰雪阻彌望川原皜若委練午霽與同人登陸較
射喜得普彝茶匕蓋出緬國碾成大塊卽古月團龍
餅屬也色微黑味苦匕盡輒甘云得詩八首

江臯阻雪 二首

獨行且萬里風雪駐江干漫向雲中臥真從鏡裏看漁
舟歸浦靜浣女踏沙寒好是陽春曲紛匕入楚彈
越客鄉關夢猶疑剡曲過千帆寒色遠萬井曙光多晃
月傾珠斗迴風散玉珂洞庭西北望縹緲接湘娥

較射 四首

江晚沙寒霽雪明弦調矢激角弓鳴十年浪負如雲氣
此日還猜投筆生

日影長堤画鵠圓凌風直上一鷗寒長安輕薄何須數
笑劇三吳俠少年

烏號弓倚北風斜金僕姑寒照雪花莫道書生無俠骨
繇來說劍重朱家
平生壯志自離奇水國飄零風雨隨夜匕老蛟波上舞
須令一箭屬男兒

戲題緬甸普彝茶 二首

玉碾團成掛客裝蠻江瘴海白雲長來從萬里非容易
只有勞人不忍嘗
地北天南何處家殘枝剩葉到天涯無人爲爾分甘苦
浪逐江流點客茶

癸巳遡上箴洲西行江村茅屋烟浦漁舟隱匕殘雪
中堪慰羈望抵小臨灣宿計程五十里是夜月白如
練流影篷窓中與客子同臥起者竟夕得詩三首

大江曉發 十韻

楚蜀分江甸來遊歲月徂斷雲峽樹隔殘雪夏城孤黃
鶴違仙客滄浪失釣徒虛空疑鼓瑟飄泊賤吹竽聊倚
歌三疊還傾酒一壺蒼匕迴淑浦隱匕出菰蘆賦豈傳
鸚鵡愁當聽鷓鴣雄心迷短楫壯歲愧遺繻投筆徒浮
漢提刀欲渡瀘古人垂業在不負臥龍圖

江舟夜月 二首

北風吹漢水何處問迷津明月斜窺戶姮娥應笑人霜
清低雁翼水白上魚鱗疑是江城笛飄來隴外春
蹤跡愁無定江鄉首重回天垂明鏡湧雪盡夜珠來利
涉虛舟楫浮生寄酒盃瓊華如可贈騎鶴上高臺

甲午繇佳魚縣經紀家洲泊竹林灣宿時雪霽風和
絕似江南暮春景色計程六十里得詩六首

六寄詩 六首并序

蓋聞丹鳳城寒春閨夢斷白狼河闊壯士顏摧
與歲月為淹留望河山之修阻未有不託物緣
情以宣其蘊結者也况夫楊柳垂樓遠分趙瑟
桃花覆井不共秦箏倚蘓氏之銀梭情隨錦織
啟秦嘉之金鑰髮並香函瑶琴承綠綺以宵張
珠淚落鮫綃而晝永固已歇帳前之微笑豈能
禁幄裡之餘愁也哉爰擬六寄詩一繼四愁作
非曰墻東好色望神女於陽臺庶幾浦上傷懷

感貞姬於蘭薄云爾

碧紗如霧映蘭房手劈吳綾寫斷腸製就雙魚親囑付

江流得似妾心長寄書

翡翠牀臨白玉窓漫携花管對銀缸詩情不限瀟湘路

照起鴛鴦個個雙寄詩

力盡金閨午夜砧相思針底結同心背人料得郎長短

密匕重封紅淚深寄衣

纖手牽絲燦曉霞殷勤細結合歡花儂顏寧比花顏好

郎憶花開定憶家寄花

傷心浦上折垂楊久擲金爐罷夕香從此寄郎携短袖

隨風一直到空牀寄香

青雀船移少女風桃花春水去溶匕江南江北情無限

盡在闌干曲折中寄望

乙未順風張帆經石頭驛天雨作遙望南屏山橫枕

江畔枯松古栢之下有廟數椽剝落不蔽風雨榜人

曰此武侯祭風臺也相傳當年為公瑾借風大破魏

軍於赤壁即此其說頗不經姑記之上茅埠達新堤

入沔陽岳州境計程八十里夜分月出江霧朦朧中

忽聞簫聲隄上羈途彌傷得詩六首

經武侯祭風臺

客行楚江風雪下鷓鴣裘敝吹灑匕十日不出武昌郊

男兒淚落空盈把今人誰與古人同古蹟偏驚到眼中

高臺已傾江水沒行路人說祭風祭風臺祭風臺我
今澆汝酒一杯當年吳魏相雄峙火攻水戰徒相猜何
人借得東風到臥龍運用真神妙羽扇一揮天冥也雲
師屏翳風師嘯旗黯也徒曉也戈戟時出手弓箭束在
腰鳥飛莫度潮水立蛟龍失勢魚鰕匿鏃金伐鼓震天
關何況千尋萬尋之赤壁赤壁摧氣雄哉至今血氣腥
山隍野火天地合青楓日夜哀功成不向周瑜處飄然
鼓棹江邊去笑殺老瞞一世雄夜走華容如脫兔祭風
臺酒一杯武侯千載後今我得重來始知立身貴有以
留得高名照青史西陵松栢墓田移不及此臺千古獨
臨江上起

淘河

汝是胡爲者相隨俱漢臯浮沉寬歲月去任狎風濤得
食傳聲切將雛戢影勞弋人空有慕冥也失纖毫

孤鴈爲賴二濬屬賦

洞庭木落水微波孤鴈差池向晚過風急影飄邊雪遠
月明聲斷楚雲多催來遊子花間筆倚遍佳人錦上梭
知爾鄉心淒切甚湖南湖北奈愁何

楚江對月

烏鵲南飛楚樹分相依江月弄紛也照來竹下湘妃淚
吹去山頭神女雲旅夢半隨潮獨上鄉心不散酒微醺
輕帆欲遡渝州遠待到峨眉猶見君

月下聞簫二首

何處高樓妾夢驚紫簫飛出鳳凰聲漢江秋水湘江樹
搖曳風前永夜清
纖手調聲入杳冥曲中吹落楚山青無邊月色明于雪
頓使鄉心滿洞庭

丙申遡風絲鴨蘭磯抵白螺山計程四十里時夕陽
在山江天湧翠忽有異鳥蔽江來下如垂雲迴若散
雪自西而東者以億萬計或曰此沙雁也頃之見下
江船星馳電激而至賈客篙師高坐談讌溯流者莫
不厲聲詛之不及余笑吟千里江陵一日還輒呼太
白起予得詩十首

楚江雜感八首

大江天際遠日夜客心愁數盡巴陵路滔々不斷流
欲問垂楊處章華入望遙只疑烟霧裡猶見楚宮腰
月暗沙灘白悲風古汨羅傷心憔悴客醒醉定如何
我是他鄉客來登何處樓許身親在日未敢說依劉
千載明妃怨琵琶去漢家至今青塚月不照故園花
偉矣申夫子秦庭西乞師盟言懸杲日今昔有餘悲
湘水東流盡黃陵碧艸齊可憐秋雨散不復鷓鴣啼
百丈牽江闊羈愁浩蕩中蕭々數莖雪吹斷石尤風

飛鳥歌

滄江雲起日初沒有客乘潮待明月蒼々蘆荻映洲寒

急漿迎風不得歇天邊之鳥從何來呼雛引類鳴聲哀
不爲衡嶽峰巒阻衝起瀟湘烟霧開疾如激矢雲間落
矯如萬馬凌雲躍翩如舞袖迴清光矐如壯士宵鳴甲
我行對汝心徒傷飄飄萬里俱他鄉青雲已厲搏風翼
丹穴何年辭鳳皇吾聞鳳皇之毛輝五色棲止梧桐食
竹實高岡延頸不時鳴一鳴應有聖人出今我欲往一
見之汝能爲我前致辭河清石爛不可待天長地久夫
何時

看下江陵船

恠汝乘流穩輕帆掛順風何當一日裏直過萬山中雲
帶岷江碧花迎夢澤紅可知愁坐客咄匕正書空

丁酉西去過石頭口兩岍俱阻險磯匕石高墜出沒
水中者崩雲散雹而起濬波頽壘孤客輕舟無不危
心其際過此爲陽陵磯臨湘縣屬岳州卽漢巴陵地
泊城陵磯宿計程七十里得詩三首

白鷗

萬里勞匕客傷心對白鷗低鳴依水住弱羽向人投不
敢希鸞鶴何曾混鶉鳩謝君明月彈去住莫相求

雁棲曲臨湘城下作

青艸湖邊木葉稀楚王臺下雁棲時凭樓誰氏如花女
手把瓊簫不忍吹碧紗朦朧月將曙目送烟波萬里去
瀟湘雨色巫山雲音書欲寄知何處

城陵驛夜泊

久客耽遊覽其如晚渡何烟青雲夢樹月黑洞庭波詩
思閑中嬾羈愁醉後多不堪飛雪處漸向騣毛過

戊戌繇城陵磯入荆江荆江發源蜀之岷山歷歸州
彝陵空都枝江公安石首而東與大江合處也此處
又一支通洞庭湖東南可達長沙湘潭西北抵嘗德
澧州諸境因爲置驛稱三楚要衝云泊下瓦子灣宿
計程六十里得詩二首

弔越女

并序

越女爲金明府侍婢也携自越江之濱卒于臨
湘適與余聯舫投詩弔之

飄泊孤魂萬里分黃沙白荻掩紅裙最憐月下瀟湘珮
不返江頭秦望雲靜夜披燈疑獨立春風鼓瑟有誰聞
當年桑陌區區愛應是羅敷負使君

晚霞

碧天晴掛玉闌干擁起鮫綃拂夜寒曾向江郎筆底度
疑從織女掌中看輕移紈扇風初薄低傍春衣舞未闌
莫道卷舒無定跡猶能捧日到長安

巳亥白霧障天江濤無際榜人牽百丈行三十里泊
曹家嶺卽華容山也環挿如屏相傳老瞞夜走處
得詩十二首

江霧

抄彙集 卷六 九
湖平接混茫何處是江鄉水白魚龍變天青日月荒五
湖飄短劍三楚落危檣辛苦隨陽鳥多應困稻梁

楚江懷古 十首

江霧隴_匕樹影遙楚宮寒色上秋潮夕波亭下漁家樂
猶說章華細柳腰

夕波亭在岳州三江口荆州有楚靈王章華臺

南望巴陵日色曛紫烟猶瑣二喬墳無情最是迎風蝶
蕩漾花前片片雲

岳州古巴陵地二喬墓在府城北

洞庭雲樹岳陽樓聞道烟波滿日收跨鶴仙人橫鐵笛
臨江吹起客心愁

岳陽樓在岳州呂真人嘗飲酒其上

蘆葉蘆花晚更疎人間歲月笑乘除琵琶峰外簷篔簹
良夜扁舟去釣魚

琵琶峰在湘潭簷篔簹谷在岳麓山下宋卓彥恭嘗過洞庭月下有老人鼓柁而歌曰八十滄浪一老翁蘆花江上水連空世間多少乘除事良夜月明收釣筒問其姓名不答

衡陽南上嶽雲孤極目蕭條咽鷓鴣七十二峰明月滿
清光得似舊時無

衡岳在衡州周八百里上有七十二峯

陵谷何年襄水平千秋杜預紀南征至今潭上沉碑處
風雨飛來一劍鳴

襄陽有沉碑潭杜預南征時紀功所立

鹿門深處憶龐公，亭下猶傳臥赤松。獨我來尋人去後，
溪花零落水雲封。

龐德公隱襄陽鹿門山，岳州華容縣有赤松亭，相傳赤松子游處。

明妃村北雨淒淒，夔子城頭猿夜啼。一曲可憐人出塞，
殘雲依舊繞香溪。

夔子城即今歸州，有昭君村，水名香溪。

年少題詩紀壯遊，春風不散曲江頭。九齡風度依稀在，
此日何人更上樓。

荊州有曲江樓，張九齡爲長史時嘗賦詩其上。

僞漢英風竟有無，臙脂流落暗芳湖。鴛鴦不管興亡恨，
夜已雙棲到綠蕪。

荊州監利縣有臙脂湖，相傳陳友諒侍姬脂粉費以此湖魚利供之。

望華容道

風雨華容道，英雄夜走時。刀鳴人語塞，箭合馬蹄危。生
死天心在，恩讐漢祚移。只今烏鵲滿，猶繞月明枝。

庚子發舟與同人爲秦宮之戲，六博五白交錯，遽進
抵車灣，宿計程三十里。夜半遙聞邊笳四起，其聲烏
烏然，與江流並咽，三聲淚下，正不止巫峽啼猿矣。得
詩一首

楚塞聞笳

短褐飄零去海涯，傷心楚水更悲笳。吹殘青艸原頭月，
落盡黃陵廟裡花。一夜風寒人搗練，千村霜曉樹啼鴉。

無邊散作蕭々淚不是征夫也憶家

辛丑自車灣早發水激沙崩聲如雷下西上高山從
起綿連十餘里間俗稱彈子山々頂有石如彈虛綴
崖間恒有落勢薄暮抵吳平套宿計程二十里得詩
一首

懷仙詩十韻

恍惚三山去依稀五老尋携來青竹杖坐我赤松林素
女傳瑤瑟湘娥接鳳琴盤分花纂々尊泛玉沉々已駕
雲駟上遙承羽蓋臨窓中含日月袖底拂商參天宇廻
鸞影神州蕩鶴陰長生寧有待大道總難任穆矣還丹
信翩然橫笛音歸來華表在滄海掛清襟

壬寅日長至經監利縣々屬荊州府溯絃調驛至石
首縣城臨龍蓋山廻插九峰下臨江水山頂有古廟
穹起望見數十里外計程一百三十里得詩四首

長至日荆江感懷

前年至日金陵遊雪花如掌吹滿頭舊年客自薊門返
羸馬荒郊嗟歲晚碌々因人年一年誰知今日楚江邊
楚江蕭々北風厲片帆直上馳如駟可憐歲月夢中分
客子途窮不可云神女向來能作雨陽臺今日獨無雲
雲雨迷離朝復暮盈々江水難飛渡虞懷宮閉景彝摧
天涯歸去仍如故

虞懷景彝俱楚宮名

江行偶興 二首

聽歌哀楚些倚曲笑吳歛芳艸猶披澤叢蘭應未蕪如
何投雜珮難得報明珠渺匕烟波闊蒼匕歲月徂
水溯三巴遠庭趨萬里長依人投戍火負米出江鄉沙
月侵裘薄天風入鬣蒼旅顏慚色養不敢炤滄浪

夜行石首縣

揚帆貪利涉乘夜度輕舟望火遙知邑吹沙微辨洲冰
寒移楚佩風急暗吳鈎龍蓋山如昨都應接戍樓

癸卯同雲四垂舟泊江滸不行因與同人渡江循沙
村而北皆聚蘆成屋婦子穴處其內微聞楚牀聲入
石首縣南門城不過數仞荆棘蔽之頽垣崩甃之間
皆鳩形鵠面惴匕作畏人狀行半里許忽見瓦屋數
椽高下七八尺四壁蕭然披戶視之卽縣署也爲余
言張逆之亂兵燹頻仍至今二十餘年人民遠竄未
能驟復也悲夫得詩二首

江村見綠柳

江雨吹來十月春枯楊一夜綠江津陌頭少婦愁多少
腸斷西風憔悴人

石首縣

君不見石首城臨楚江起千門萬戶虛無裡劉郎浦接
瀟湘雲黃金堤飛巴峽水公子王孫午夜游妖姬寶馬
玉雕鏤蠟炬浮窓長似晝露桃覆井不知秋匕風秋雨

吹來暮誰道荆榛塞行路烏鳶紛集颺啼盡是當年
歌舞處

劉郎浦卽漢昭烈娶孫夫人處黃金堤在其左

甲辰大雪漫天朔風凜烈榜人牽火仗僵凍不能步
三十里達蘆蓆灣時漏下當亥半矣得詩一首

苦寒行石首道中作

漫_匕冬夜長凜_匕寒風發洳_匕江水深渺_匕烟波沒一
身隨飄蓬如何得飛越况乃衣裳單積雪明于月撥爐
凍不然打火手欲裂汲水難作羨朝糜以時歇坐聽豺
虎喧搖頭掉饑舌烏雀藏羽毛猿啼濺碧血雙槩溯空
濠觸石篙再折牽纜_匕不前十步九蹶躓卽此行路難

何必登九折垂堂有遺訓庶幾保薄劣

乙巳雪霽風寒溯和穴而上經公安縣抵馬家寨計
程四十里得詩二首

凌波曲

十二峰頭雪乍晴楚王宮闕焰江明中有麗人何盈_匕
細腰結束織羅輕翩如芍藥當春生矯如鸞鶴臨風驚
流芳發豔杜與蘅將往復還盤百層含羞促態交縱橫
傷心江水深難測淺移羅襪嬌無力欲去江南望江北
風波渺_匕長相憶滿把芙蓉不忍擲爲君留得紅顏色
可憐楊柳紛如織可憐桃花委路側日暮風來空歎息

雪霽對酒

澄江晴雪點征衣對酒當歌興莫違冰竈香分菰米熟
玉盤光動鱖魚肥峰迴衡浦疑無定雲去巫臺凍不飛
明向巴人傳古調知余新自郢中歸

丙午晦天霽放棹因計客程薄暮可達荊州爲時五
十日經途二千七百六十六里昔武伯蒼詩路半嘉
陵頭已白蜀門西更上青天我勞如何泊沙市宿計
程四十里得詩一首

將至荊州口號

孤舟獨客三千里吳北荆南蜀道西不信風寒無雁影
邨堪雪落更猿啼躡身青天愁未半堆鏡白髮數難齊
手足凍皴天地合長鏡相顧色凄

季冬月在塞涂□□□丁未朔候關沙市不行沙市
卽楚之故城也相傳章華臺遺址在焉綠柳飄殘細
腰人去今昔之傷黯然矣盤通濟橋西上入楚莊王
廟荆榛瓦礫半窟狐狸徒步十五里到府治荊州居
上遊重鎮其地無崇山峻嶺沃野千里此英雄必爭
之地也使蜀漢建都于此北據漢沔南控湘潭西轉
巴蜀之糧東制吳魏之敵則一統之業不遜關中奈
何退守成都鞭長不及遂爲千古恨事再尋曲江樓
楚雄樓故址無一存者僅于東南望古堞滅沒之際
有屋巋然不蔽風雨父老指示曰此王仲宣作賦處
也樓旣不存碑亦無考嗚呼仲宣以高平人避亂依

劉登樓自廣當是之時流離閔凶幾不能保逮其後
遇子桓子建兄弟弭筆南皮聯詩廣讌風流文采炤
耀建安黃初間雖稱失節殆亦遭逢斯世之一快矣
旣而夜色欲浮從者促駕繇故道歸謁三義祠捫碑
知祠左尚有武侯像今不存得詩五首

沙市尋章華臺故址

靈王千載後寂寞是章臺無復垂楊色何人走馬來月
留歌扇在雲作舞衣猜不盡湯水東流日夜哀

題楚莊王廟

夕宿沙市城朝馳郢都道北風亂枯艸
色年已枯復榮人生代謝如流星莊王霸圖寧已
巍然古廟臨荒城臨荒城白日暮野火燒陰房纍纍走狐
兔吁嗟哉天地從來不愛人賢愚貴賤北邙塵請看章
華臺下青柳昨日繫馬來如雲今朝零落夫何有

曲江樓感懷

九齡風度竟何如樓閣今時入艸墟不見春鶯催授簡
祇看秋月炤揮鋤楚江野老瘡痍在唐室浮名涕泗餘
我亦捫碑迷出處雲山立馬獨躊躇

仲宣樓

仲宣多難此登樓今日何人到上頭風白千門霜杵急
月明萬堞夜烏愁干戈滿目他鄉淚詞賦傷心故國秋
莫道曳裾終仕魏區區應不負依劉

荆州弔武侯祠舊址

荆州北溯大江迴蜀相祠堂幾劫灰秋雨難移春艸碧
霜花空傍水雲開三分事業心猶歎萬里風濤客漫哀
此日中原猶未改何人抱膝臥蒿萊

戊申繇梢箕凹行遠望龍山隱匕指孟嘉落帽處狂
歌浮白計程二十里泊虎渡得詩一首

望龍山懷孟參軍

晚霽雲初斂龍山入望開古人曾落帽吾輩復啣杯菊
憶明年會舟移萬里臺夜深織月上彷彿醉歌來

已酉盤龍洲而上出鴛墅溯石套晒穀灘牛欄磧至
流店驛匕屬枝江縣對江爲下百里洲舊志縣向有

九十九洲及宋文帝在藩忽生一洲未幾嗣位卽此
計程六十里得詩四首

楚宮詞二首

楚王宮闕焰江平衰柳寒鴉盡野營只有舊時歌舞月
夜深獨上紀南城

紀南城在荊州城北楚昭王時吳通漳水淮紀南卽此

雕欄玉砌想當年此日秋風倍黯然薄暮渚宮雲片匕
不知飛落阿誰邊

渚宮楚襄王建元帝卽位于此在江陵

賦得秋江花月送歸人

秋江灩匕月初起江上年匕焰遊子遊子辭家月未圓

幾經月缺猶江吐月圓月缺映江花
月朦朧度淺沙
天下何人不作客
裡何人不憶家
憶家盡說還家好
及至還家心悄
倚花對月望秋江
只愁花月催人老
有客家住大江干
月下移舟花下還
家自有如花婦
雙手相携月下看
如花似月當窓牖
却話江南作客久
豈知尚有未歸人
獨臨花月秋江口

百里洲看新月

孤舟纖月上客思亂紛
乍接龍洲水還侵鴛墅雲
畫
睂窺鏡遠翠袖倚闌分
淒絕南飛雁高樓萬里聞

庚戌泊百里洲時日暖風和江天澹冶爰命童子張
弓調箭習射爲娛賴子曾美則挾彈馳騁白沙間手

眼敏捷超絕平陵也爲倚楫而寫之得詩二首

較射

風煖角弓柔平沙控紫騮聊抒萬里目不作五陵游
鏃暗連雲墜鵬飛雜雨收書生非燕領黑髮愧封侯

挾彈曲贈賴樸

玉靶金鞬紫綺襦少年挾彈出城隅朱弦不試流星石
素手飛來明月珠東有鴛鴦西鸚鵡紛
匿影交相屬轉眼纔收沙上鴻翻身又下雲中鵠
雲中沙上驚如神顏色不動彌逡巡他年廟堂之間有爾什百輩定教高閣圖麒麟

辛亥携客江村一望民舍數椽半屬兵燹夕陽明滅

中與亂流相映黯然無色得詩二首

沙洲獨眺 二首

荆門西望去漫七萬里悲歌行路難欲采芙蓉當歲暮
製成荷芰却秋殘邊烽半落巴雲暗江雪初消蜀樹寒
聞道明妃村在近琵琶忍向客中彈
荒甸猶存百里洲黃沙白荻動人愁幾經兵火連天起
賸有瘡痍帶淚收寒鷺夜驚飛斷鏃饑鳥朝舞啄枯骸
船來隔浦遙聞語不是江州定蜀州

壬子與客約射中者飲酒負者罰詩彼此相競不知
日之西沉矣燈下得詩三首

懷高上人韜光精舍上人曾學文于余

韜光精舍澗橋分翠竹蒼松接紫氛帆影秋風與爾別
經聲靜夜有誰聞憑簾虛捲湘江月攬筆應搖滄海雲
莫道關山萬里隔還隨夢裡細論文

寄西陵徐汾周禹鄧璿陸寅家大年兼問月上人
劔閣山高客路懸故人回首各茫然楚江明滅分秋練
吳樹依微隔暮烟土室夜寒應頌酒蒲團月落幾談禪
北峰野衲今頭白知爾聲聞日日傳

荆門道中次趙昌齡見寄原韻

句亶城邊巴水秋夕烽遙掛片帆愁雲霄去住疑黃鵠
身世浮沉信白鷗巫雨漫憐隨夢遠澤蘭應不媚人幽
傳來藉爾陽春曲散入長江萬里流

史記楚熊渠立其長子康爲句亶王卽江陵

癸丑得詩三首

寄懷沈忭沈煜兄弟兼簡裴亮佐

二首

大江流日夜獨客盡秋冬未歷征途半徒懸鄉淚重雲
山悲蜀道霜露弱吳儂悔別求羊侶蓬蒿一徑封
料得城南北歡娛莫與倫月移金谷暖雪擁玉缸春柔
翰分詩細嬌絃顧曲新臨風傳笑語曾念薄遊人

懷陳培陳禧扶櫬粵東

目斷悲風萬里塵沉香浦上雪衣人日南珠盡鮫宮淚
江北花遙驛使春當世才名虛顧及少年兄弟辱朱陳
夜闌只有天涯夢松月寒窓話苦辛

甲寅金明府發舟先上期我彝陵道間帆影長天羈
愁俱遠得詩三首

敝履

二首

北去燕關西蜀門羸糧徒步重懷君今朝不肯輕拋擲
篋笥風塵念舊恩
猶帶家園艸色來蒙茸不忍上高臺應知萬里分針線
盡是燈前和淚裁

戲題白髮郎

少小年華鏡裡春朱顏嬌倚髮如銀若非玉案司香吏
定是瑤臺竊杵人月擁翠鬟嘗帶雪花搖螺髻不飛塵
笑他李白三千丈空使長愁老此身

乙卯辭百里洲溯采穴西去此上水勢便湍迅不嘗
矣再越拖泥灣共程二十里泊上百里洲時月明如
雪江流倒影與白沙相亂短棹淹留延賞不已得詩
十二首

古別離曲爲挽船士與妻別作八首

雙手牽郎衣送郎從此去紛匕霜露寒月落搖江樹
未問郎歸期只恐風波惡不聽三聲猿妾淚中宵落
妾淚如明珠灑郎衣袖斑郎今且勿問去時仔細看
青天橫蜀道灑瀕水中堆但聽子規鳥聲匕歸去來
風寒江水闊幾日上瞿唐瞿唐七百里不比妾心長
強欲隨郎去郎言行路難強欲留郎住郎衣不可牽

郎去何匆匕未悉衷腸語翻恨郎初歸佯羞整機杼
從今擲梭去渺匕凌烟霧無數長相思倘到郎船處

百里洲發船志喜

從此乘風去路遙巫雲峽雨接江潮浮名世外誰騎鶴
壯志天邊欲射雕楫倚青山羞短景杯含明月醉寒宵
成都物色今何似容我重題司馬橋

望蜀

蜀國山川舊漢都城臨八陣見雄圖幾年曆數謳歌盡
千載英雄涕淚枯濯錦江沙應牧馬浣花溪樹不啼烏
扁舟只有傷心客風雨蕭條極望孤

沙洲月下較射二首

白雲深處隔瞿唐
離弓倚月望蒼虵影斷長空雁幾行我欲寄書天外去
鄱人未敢賦長楊

丙辰蟠雀兒尾過樓堆宿對江洲畔遠望古木槎枒
鬱然一大村落及登眺絕無人烟舊時井竈僅可從
荒茅叢篠之餘一指兵燹遺跡斯時也江月弦魄流
影樹間饑飛烏鵲悽愴人懷計程五十里得詩三首

弔漳平陳參洲先生

并序

先生諱六韜漳州漳平人登乙丑進士以中翰
備兵天津有惠政至今稱之先生負不羈才以

晚遇且坎珂宦途遂類唐詩酒間不問生產客
至輒醉也後倚節而歌頗作曼聲以永之買二
姬爲燕趙女善歌舞先生於是豪益甚鄉里以
是嘗非之先生則傲哂莫顧也無何北師南下
閩中兵大潰敗山村野老無勿鳥獸散先生怡
然謂家人曰汝輩且去我姑飲酒以待已而兵
勢急家人各竄去左右惟二妾在焉先生猶
飲酒如故也顧謂曰汝何勿去二妾泣曰妾固
已心知之願從死無憾先生喜陽也入中堂具
冠帶望北闕再拜命取硝黃百斤置堂下先生
高坐其上二妾左右侍舉火自焚大笑而死時

蓋丁亥之三月也嗚呼先生可謂從容赴義矣
當時分符擁節不知凡幾乃兵未接刃抱首先
奔先生無尺土之寄片檄之加而視死如歸不
忘君父何其壯哉以是知昔日之傲岸莫顧者
夫固有不得已託而逃焉者也義聲所激二妾
景從風雨冬青呼之如在余不文無以傳信聊
從龍岩蔡子仲吉口授爰紀之簡端以備後之
采述焉

乾坤有淚獨潛匕率土誰知國步艱漫向碧雲埋白髮
不留青塚炤朱顏月明猿嘯催腸斷花落鶻啼濺血殷
借問仙霞南北望龍髯何處得追攀

江行口號二首

青雀舟移雀兒尾烏紗洲賣沙魚美停船買魚開酒嘗
醉看江月織匕起

醉來江上酒家眠少婦留歡劇可憐以我清詩三兩句
換來斗酒十千錢

丁巳上烏紗尾灌子灘出犂角洲匕與松滋縣迤對
縣當九岡山之麓下臨大江林木蒼鬱余因欲尋一
柱觀故蹟榜人言張逆之亂人民遠竄卽官斯土者
至今猶傳食民間城空僅窟豺虎耳溯王家山過羅
溪口抵碓窩灘泊舟計程五十里得詩四首

望松滋縣二首

扶桑閣集 卷六
滿目悲生事荒城亂艸間不留一柱觀猶對九岡山野
燒依舟盡江雲落樹閒無情巴峽水東去那知還
天地當龍戰城池半虎屯路隨官舍沒江帶女墻存空
見分荆甸徒傳控蜀門傷心三戶盡難拭舊啼痕

舟行羊角洲漫興

昨溯雀兒磧今過羊角洲沙明涵水鏡樹斷出山樓老
戍邊城暮孤帆水驛秋誰憐長作客短髮看吳鉤

巴江夜渡

萬仞飛濤下輕舟夜莫停櫓搖江月白猿掛嶺雲青飄
泊陽臺夢虛無帝子靈况逢笳吹發孤客那堪聽
扶桑閣集卷六終

扶桑閣集 卷七

日觀山人朱爾邁人遠簷

西瞻詩三

戊午確窩灘蚤發上鵝兒磧七橫亘江面石勢隆起
片七挾飛鳴之概南岬青山遙逼塔影孤懸林木隱
隱中見睥睨與崕谷上下爲枝江縣繇龍窩達白陽
驛此上崇巒皆接壤起矣不數里至宐都縣城如彈
丸過馬踪磧出陽仙鎮之野雞套宿計程五十里得
詩二首

江行 二首

滿江秋月淨無烟一片輕帆直上天何處夜猿啼不歇

相思人在白雲邊

霜花落盡楚山低水盡長天路轉迷夜七扁舟明月滿
炤人獨自渡巴西

已未渡雲池入紅花套七內略有人烟上爲虎牙山
山石齒七橫嚙江北石色紅間有白文亦以形似名
昔公孫述依之作浮橋拒漢于此下曰虎牙灘與荆
門山屹然相對水經注謂楚之西塞也郭景純江賦
曰虎牙桀豎以屹崒荆門鬪竦而盤薄圖淵九迴以
懸騰溢流雷响而電激蓋狀其水勢急峻也荆門下
亂石怒起出沒江流間行里許忽兩崖中斷上臨石
橋貫以江水紆迴分纜而亂峰復叢插其際傾岑爭

勢再上懸崖萬仞四面斗絕周匝十餘里如城墻迴
抱飛瀑紛下暖若霧合亭午舟行不見日景此西來
奇觀于是乎始也無何出臨江口望天竺山危巒峭
壁若七孤上又歷胭脂壩溯烏龍浦青艸灘到彝陵
州卽秦伐楚燒彝陵處南臨江山之險東控楚關西
分蜀道一大都會云計程七十里得詩六首

落日次陸講山先生原韻

長江水氣接鴻濛晚日斜暉映碧空不信滄溟沈若木
遂令霜露落梧桐捧來難接仙人掌吹去應臨帝子宮
莫道崦嵫長隔斷光華還與萬方同

虎牙山懷古

虎牙山色望中收，艸昧英雄誰獨留。
躍馬徒傳荒磧暮，浮橋不鎖大江秋。
幾年城郭曾開蜀，半壁乾坤總屬劉。
風雨至今天地暗，飛鳥聲裡戍烟愁。

望荆門山慨然作遊仙之想

萬疊荆門擁客舟，無邊山色掛江流。
輕霞未散仙人竈，積翠遙分玉女樓。
悔別孤亭辭白鶴，欲尋幽谷失青牛。
那能乘月高飛去，夜七峯前散髮遊。

夜遡彝陵呈同人

吳客長途感馬斑，蹉跎猶逐楚雲閒。
月移青草灘頭權，燒接烏龍浦上山。
歲暮愁心闕北極，夜深鄉語雜南蠻。
勸君珍重沽來酒，春色難迴憔悴顏。

彝陵夜泊 二首

天半彝陵道，扁舟獨夜來。
城孤懸楚望，月冷失秦灰。
戎馬青山在，蓬蒿白骨開。
巴歌聽已矣，進入嶺猿哀。
城郭雲中斷，兒童亂後稀。
楚關今若此，蜀地望尤非。
旅夢青山作佳期，芳艸違西行多少。
淚濕盡老萊衣。

庚申彝陵蚤起謁黃陵廟黃陵嘗佐禹治水有功諸
葛武侯因立祠于黃牛峽爲神此其別建也南爲孝
子岬孝子卽漢姜詩蘆林故蹟有泉曰孝婦泉謂姜
詩妻龐氏也上有龐氏祠今不存岬之下爲綠蘿溪
歐陽詩江上孤峰蔽綠蘿是也東南一峯最高俗稱
摩棋山謂張三丰修煉于此頂上猶見石碁儼然云

再入彝陵之鎮川門多兵營民廬絕少因尋爾雅臺
六一絳雪遺址竟不可得矣出中水門步江灘習弓
矢遇異人指示箭法往七奇中心甚壯之得詩四首

江灘早行

曉起凌江霧衝寒度板橋山青孤堞迥霜白萬家凋旅
望分來雁鄉心接去潮可憐征戰後哀些實難招

黃陵廟

日夜黃陵廟灘聲轉不休流來蜀帝恨散作楚宮愁俎
豆垂江石興亡問野鷗應知明德遠猶爲禹功留

彝陵野望

彝陵西去峽流分客路惟隨麋鹿羣孝子蘆寒空逝水

仙人碁散不歸雲登城難作依劉計乘傳誰爲諭蜀文
萬里壯心憑一劔便應投筆事從軍

月下戲贈雲陽小史

邂逅同看月色新朱顏分焰楚江春家居雲雨陽臺下
正是襄王入夢人

辛酉望復登黃陵古廟看羣兒以纏珠爲戲者纏珠
卽古擊壤遺意與燕京之打棹七八聞之撲格羅無
異其形似棗核或寸許或二寸許以鞭七之輒旋繞
無已時如珠轉盤也暮歸復與燕人講箭法歡甚不
知月掛帆檣矣得詩二首

黃陵廟獨坐用壁間韻二首

抄本附錄
卷七
四
歲暮巴江冰雪開黃陵廟裏獨登臺無邊粉堞吹笳起
不斷雲山接燒來舊國瘡痍分涕淚異鄉天地入蒿萊
却慚世亂爲儒負豈止臨秋宋玉哀
客舟萬里大江開咫尺巫山神女臺笑我無家頻北向
憐君何事亦西來會看寶劔鳴風雨那有明珠閉艸萊
援筆漫留名姓在雄心莫遣夜猿哀

壬戌辭彝陵之鳳棲驛出冷水磧上三溜子溜上山
石橫枕離奇頽落如崩雲瀉霧不可一狀繇南津關
入荆官峽卽西陵也此爲三峽之始峽流峭束飄同
衣帶重巒疊嶂青翠相逼其境淒異若不可以久居
南津關宋爲下牢關按唐元和郡縣志下牢鎮在彝

陵縣二十八里隋于此置峽州貞觀九年移于步闡
壘其舊城因置鎮少陵有上牢下牢修水關詩舊注
上牢巫峽下牢彝陵也十餘里過黃金藏宋陳膺曾
于岷竇間得遺書爲古易傳云聞此上更有三游洞
巖壑佳絕爲元微之白樂天兄弟得名以舟速未及
登覽西爲梢公梢婆石匕立山頂彼此相望儼然人
形下爲火仗背火仗卽船纜也蜀人稱纜爲火仗以
竹片爲之闊寸許首尾連綴緝以白麻長百餘丈用
火蒸熟以便涉險卽杜詩所稱百丈者是懸岷迴抱
中有石線十許條延袤如纜之相牽然故名又西臨
石碑高可十丈四面如琢方特立岷際絕勝始皇無

字碑矣薄暮抵黃頽洞宿黃頽卽黃刺魚也闊口無
鱗以其形似得名計程三十里與同人據石飛觴率
爾休暢已而月出東嶺流光披練山空水落悄無人
聲斯時也呼猿鶴以爲徒渺天地于一粟望景爭途
豈復人間世哉得詩五首

舟中晨坐彝陵作

邊馬嘶寒急霜風割面來空垂去國淚何處望鄉臺形
影親孤劔波濤送一盃荒殘今更甚不必問秦灰

入西陵峽二首

西陵當峽口楚蜀限雄圖漸覺乾坤小迴看日月孤雲
根穿樹斷鳥道入天無一片飛濤影興亡烙眼枯

萬里游偏勝茲行是画中江迴疑路盡峽斷信天空野
服排蠻瘴霜帆觸厭風何人疏鑿始臨眺及微躬

山上迴風方言稱厭風

黃金藏

旭日散霽色方舟出微茫峽勢何鬱々憑虛若飛翔幽
壑迴春姿碧艸揚芬芳我行日已遠我心多悲傷俯視
萬里流仰攀千仞岡臨風無羽翼奈此黃金藏黃金去
世久寶軸歎淪亡羨彼谷中鳥高舉凌蒼々

峽中對月

已近天邊路扁舟入窈冥風過一水白月出萬山青久
客詩嫌細寒宵酒易醒明朝西望處相對又空舲

癸亥發舟霜露中卽披衣起惟恐名勝去我行里許
爲蝦蟆碛蝦蟆碛者有巨石如屋中空洞上下石筭
交錯與齒牙相類而背脊吻頷尤逼真水從中流湯
湯不絕渭南集云水晶所載第四泉也從口內列炬
而入四五里石色綠潤可爲硯黃山谷有遊記從此
溯喜灘過天柱峰匕高千仞南岬巉崑環繞參差如
筆床旁有石門援蘿梯葛略通人烟再西見兩石遙
對一似頭擁箬冠峩然高坐者一似披袈裟露頂蓋
獨立岬際者榜人曰此南爲和尚石北爲道士石也
出南池過馬鞍灘至果園叢石亘起離奇萬象榜人
牽火仗出沒其間忽躋忽墜繇小紅石大紅石渡大
小無泥灘俱頑石頽疊其中舟行無路僅于石隙盤
旋而上爲羅漢溪石勢玲瓏簇起灼匕如芙蓉吐萼
者數里達黃陵廟上名山大川閣望黃牛峽高峙廟
後白岬萬仞迴合如屏障酈道元所謂離匕蔚匕乃
在霞氣之表也廟三楹袞冕端坐者爲黃陵神後列
武侯像最後一神修眉道冠手持龍節杖左侍一黃
犢者爲土星殿摹碑黃陵神者土星降生初佐禹治
水開鑿江峽後人因建祠于此久漸零落矣自武侯
入蜀遙見神像隱見石壁間前樹旌旗後駐黃犢猶
有董功開築之勢因重祀之屈氏世爲祝史蓋左徒

後裔也歷唐宋元世崇封號至明初敕賜黃陵江石
灘之神每歲孟春命有司祭以少牢洎嘉靖戊戌或
因舟艦之衝仕商輻輳歲徵廟租典守者相轉徒廟
貌傾頽鞠爲茂艸越丙寅始得蠲其苛政焉至于今
亦仍其祀水經注亦稱高岬間如人負刀牽牛人黑
牛黃成就分明莫得究悉望之果然灘下亂石危倚
水流交衝亦名無義灘或曰禹平水土黃龍負舟至
此而止其上則杜宇開道也計程二十里得詩二首

黃牛峽

沿流遡絕巘振衣恣登陟鳥道虛無中可望不可接猿
猱跳我前哀響亂步履此徑何人開傳是黃牛峽黃牛
去不還峽勢雄巖業驚風吹玄雲乘高若散雪亂插碧
芙蓉豁達開芳節始知天宇寥倒影向空齧如何世上
人局促工磬折達士無細觀俯仰空一切

謁黃陵廟題閣

黃牛古峽亂流中萬仞飛樓倚碧空巫雨北懸夔子國
巴雲東斷楚王宮蘋蘩豈盡酬神力水土長留佐禹功
詞客飄零非四載平成今日愧微躬

甲子雪阻黃陵灘擁爐探韻殊苦詩思不屬爰携好
事者扳危棲陟懸磴據石高坐憑眺岬谷間衆鳥無
影白雲亂飛孤嘯一聲林谷響應此時正不知身世
何有也得詩一首

黃陵灘雪阻

風雪經過天一涯
乘流疑是泛仙槎
江分衣帶迴如練
峽倚芙蓉散作花
紅石灘寒迷野燒
黃陵廟做亂棲鴉
紛紛曲裏吹難盡
多少長征人憶家

乙丑雪霽榜人牽纜走亂石間十步九躓里許卽泊
舟飛泉崩瀉風激成冰帶阜纓巒望同瑤圃無何忽
見群鹿呦呦得艸相狎羈遊宦子聆之莫不傷思矣
得詩四首

峽中晴雪懷許七齋

天連斷峽水迴灘
蜀地誰憐行路難
翠壁曉縈珠樹暖
澄江晴散玉蓉寒
銘垂劔閣心猶壯
酒灑銅梁興莫闌

恨不相携玄度在
扁舟同入画中看

峽行二首

雪後風霾失路蹊
青山岍岍白雲齊
只憐峽水東流盡
不與征人共向西

萬里經過風雪中
滿江飛作玉玲瓏
空山一夜猿啼急
盡帶金閨珠淚紅

鹿至

空山迷積雪
群鹿到何心
已見層冰裂
誰云芳艸深
峽橫雲出沒
灘急水浮沉
况復多豺虎
呦呦慎爾音

丙寅黃陵起行過大沱小沱
此處峽勢忽斷吐平沙
二里許灘上亂石林立如龜如虎
不一狀按歐陽公

硯譜歸州大沱石斑_匕有文其色青紫頗發墨惜水
激不能上也再西爲銅錢堆峽峻灘激數十人牽挽
蟻聚叢石間兩不相應僅伐鼓舉旗以爲進止屢上
屢下毫髮萬丈危矣哉溯狼頭鹿角二灘卽杜詩鹿
角真走險狼頭如跋胡也水經作羊腸虎臂灘越此
曰三斗坪曰使君灘_匕繇楊亮名亮爲益州經此至
今稱使君云李白送宋少府詩直向使君灘嚴武寄
少陵詩興發會須馳駿馬終當重到使君灘卽此過
飯甑倒至狼尾灘余與同人徒步先行牽藤作杖踰
石爲橋上倚懸崖絕巘之間看扁舟亂流而行渾洪
巖怒勢同雷轉此心輒怍_匕不能自己輿地紀勝狼

尾灘陳時屯隋兵之所也是日行五里得詩一首

峽中早發

日高寒峽迥雪霽大沱空不是長行役何人到此中
鵬啼催短景猿嘯激長風只有聯舟客傷心歲暮同

丁卯蟠腰磯渡鐵鑪背至榻洞灘渭南集作達洞皆
迴風旋流從空而下榜人挽火仗緣綴雪崖間咫尺
波濤有一瀉千里之勢此西南來險灘之始也或曰
水經流頭灘卽此注謂其水浚激奔暴魚鼈所不能
游行者嘗苦之其歌曰灘頭白勃堅相持倏忽淪沒
別無期袁崧曰自蜀至此五千餘里下水五日上水
百日也過上下羊背斗崖忽起日色隱蔽里許爲屈

溪驛屬彝陵今革此來巘岫旣高江湍紆折途經信
宿猶見黃牛故謠曰朝發黃牛暮宿黃牛三朝三暮
黃牛如故蓋言其山水嶮絕廻望如一矣計程三十
里泊空舫峽口得詩二首

峽中感懷

鄉關行已遠舟楫事多經江水飛愁白雲山入淚青劍
長披燭_匕髮短看星_匕便欲題橋去還因陟岵停

達洞灘

三朝三暮出黃牛達洞灘聲望轉愁一片驚濤飛雪色
吹來白盡旅人頭

戊辰自空舫灘入峽盛弘之作空冷杜詩作空靈陸
游作東濡不知何據紆流細折峽口巨石臨危疑無
路可入從北岬牽挽而上濬湍洞滴眩若山騰峽內
山勢譎起絕嵯壁立極地嶮之崇峭真飛鳥不能栖
也水經注謂峽內五六峰叅差互出上有奇石如二
人像攘袂相對者俗傳宐都建平兩郡督郵爭界于
此宐都勢小東傾議者以爲不如也志此亦堪一粲
再西過鴛鴦石見懸壁上奇石綴空俗呼爲牛肝馬
肺石顧見石色層比_匕如紫芝出土狀余以石芝
顏之及讀茗水徐翻記作靈芝石良是自此歷鹿耳
背將軍灘射洪磧共程二十里達新灘下沱下沱至
上沱凡五里阻險灘者數如之灘上大石磴礧高下

數丈客舟至此纖毫俱從陸運然後以空舟牽挽而行土人數十家巖栖穴處者各半老少男女以負戴爲業一人負數百斤僅易米一二升許勞苦殊傷人懷是日卽泊下沱携客先從亂山中蹶蹶至上沱看水勢與吾鄉潮汛無異而峽逼江迴崩注湊盪更奇觀焉余更躡一百十八級上馬根山之半爲東嶽廟廟前枕灘水案大王山老僧爲余言向者十三家之兵結寨歸夔以新灘爲門戶彼此不相通者將六年鄉民遠竄至今未歸悲夫得詩二首

入空舫峽

空舫望不極信棹入雲烟水激疑沉地山高欲擬天輕

紅隨幔捲寒翠逼窓懸險阻看如此來遊愧壯年

新灘寓目

羈危萬里溯新灘此去天邊路倍難霽雪乍消江樹暖浮雲不散峽門寒怪分歲月經愁老怕問瘡痍帶淚殘只有鷓鴣飛下上朝來暮去狎波瀾

已已捲衣拈篋從下沱走上沱荆棘中捫碑自嘉靖

二十八年兩山崩墜凡仕商舟楫至此水行旣難陸

運更阻有土人嚴廷用者顧而傷之爰與金陵二僧

闢艸纒石數年略成蹊徑此新灘所繇始也及讀渭

南集新灘兩岬南曰官漕北曰龍門龍門水尤湍急

多暗石官漕差可行然石鋒多銳故爲峽中最峻處

則此灘自宋已有之矣又按水經注有新崩灘云是漢和帝永元十三年崩晉太元二年又崩當崩之日水逆流百餘里湧數十丈今灘石或圓如葦或方似屋者皆崩坼所致也豈卽是歟或曰新當作星再上三十里有葉灘葉當作月諺云有星無月有月無星蓋謂月灘高星灘低自春夏水發則月灘半在水中上下諸舟亦須陸運至秋冬水落則月灘高峙兩坼而星灘之石露矣惟上沱爲最險余到此候舟坐臥灘上者竟日看懸流崩瀉湧若噴雪中當巨石雄峙奔捍激蕩吹成大泡渾如天球之轉然其大可數十圍盤旋白浪中與曦月爭耀因笑曰此地卽名星灘請自今日始第恨無石工不能大書勒坼石耳姑筆之以冀後之好事焉下春喜遇八板船自合江至余遂携客同下宿上沱屈指明朝已屆臘夕矣瞻蜀道之天高悵趨庭其尚遠夜半聽灘水湯湯與愁俱永得詩一首

坐星灘題石壁

胡爲岐路側走險却如歸天地連山斷波濤帶日飛輕囊垂似重短楫渡尤稀歲暮空回首浮生笑布衣

庚午擬兩舟聯發一舟颺風激水不能上午後風息聚百餘人牽纜者四復以巨絙縈其前後架木爲輓轆盤運而西同人從高坼伐鼓鳴金以助之扁舟出

沒浪申上下迴復心目洞駭者久之薄暮抵岷幸已
川路之難此爲第一按渭南集宋皇祐三年知歸州
趙誠聞于朝著令自十月至二月禁行舟疏鑿之未
能悉去者以灘上居民利于敗舟滯留買賣搖沮此
役也惜今時無建此議若乘十二月正月水落石出
時併力鑿去銳石則仕商之利奚至壞溺之紛也
是夕屈首孤篷遙想故園兒女上侍玉母膝下秉燭
開尊話遊子蜀行久應稅駕矣誰知浮萍之泊尚阻
星灘夜半風作亂流激蕩一葉之舟靡所栖薄有懷
如何得詩一首

臘夕星灘阻風

空山寒翠逼千尋節序難爲行路心鄉淚不關猿嘯急
旅愁直到峽流深萊衣夢裡趨庭舞栢酒尊前秉燭吟
夜半江豚吹浪起吳雲蜀樹轉陰

辛未大風不止峽水衝瀉有崩山蹴海之勢一舟堅
守灘畔酒後耳熱孤燭斂光獨臥寒篷聽悲風從石
竇中出其聲烏然與客愁共咽得詩二首

客愁二首

灘星遠接嶺雲浮雪浪氷澌擁白頭十日船行五日住
聲吹亂客心愁
腹裏車輪輾轉齊千盤峽路片雲迷灘頭偏會留行客
不遣風濤送客西

壬申候隣舟樹桅未行再盤鳥道至灘口看別舟牽
挽西上纜一失手竟入蛟宮篙工舵師俱從急水中
攀援而上僅以身免薄暮行里許泊石虎沱宿癸酉
發舟出雙廟子兩山斗起中見壁上層石數十疊如
卷帙高擁狀榜人進曰此爲兵書峽也相傳武侯所
藏昔有其御史架木懸梯而上竟不可得愚哉或曰
卽白狗峽南崖爲米倉口四廻俱駝峰凹甕嶮石齒
齒獨此洞下覆同厰倉噴沙如米云再上山巒迴合
之餘忽地勢平曠雜綴數百家爲古香溪口以昭君
入宮之初曾滌妝於此故名源出昭君村水碧如黛
少陵詩生長明妃尚有村是也按水經注作鄉口溪

源出歸之故城東南數百里西北入縣逕狗峽下江
渭南集過溪里許有洞其內頗宏敞石上俱成幢蓋
龍虎芝菌之形其絕異者東石正圓如日西石半規
如月惜未登覽以俟後遊從此上黃牛三滾處水勢
洄漩篙纜乍弛一舟便隨水轉如明珠之走盤行者
無不心悸又遡蓮花三灘上石勢參差飛動宛似
蓮花之出水者略轉而西出屈沱爲三閭大夫故宅
又盤石葫蘆過舊歸州尚有蘆舍數十家無復古堞
矣北岬卽今歸州城隱隱山半喪亂之後僅存餘址
迤對方灘巖峻峽嶮上下相懸數十丈臨之目眩欲
進則投足無所榜人援藤扳葛而上背負火仗接手

相引纒。如猿飲蟻涉。無不惴懼交。顧汗涔。下也。
幸遇順風西上泊舟計程二十里得詩八首

望兵書峽

嶮峽何年鑿。兵書望儼然。不隨金篋鎖。空向石門懸。
木埋清晝風。雲倚碧天壯。心難自己爲。爾脫龍泉。

題米倉口石洞

楚蜀兵戈後。民貧不療饑。如何米倉口。竟向峽中移。
煮石仙翁去。炊沙山鬼疑。客行蒿目處。有淚只空垂。

香溪懷古

紆迴碧水瀉澄溪。猶焰明妃曉鏡齊。珠粉香消花自落。
翠環聲斷鳥空啼。千群簾篔橫關塞。一曲琵琶散鼓鼙。

青艸至今長似舊。恩深漢主故萋。

過黃牛三滾處

紅槳輕搖青雀舟。白波滾。似黃牛。卽非三暮三朝遠。
落盡征人鬢裡秋。

屈沱弔三閭大夫

荒山臨野甸。仍是屈原沱。不復滋蘭蕙。徒然披薜蘿。
滄江埋骨去。青史愧人多。日暮猿啼急。流哀動九歌。

懷屈五大均

江花欲然峽雲碧。落日迴光盪巖壁。荒。遠水焰沙寒。
傳是當年左徒宅。左徒宅邊杜與蘅。流芳發豔激餘清。
何人矢志光日月。均也才調今縱橫。出門掉頭不肯顧。

烟水茫茫自來去散髮時弄羅浮花携家愛看耶溪樹
可憐花樹臨春風朱顏灼灼隨飛蓬懷有明珠寧抵鵲
腰懸寶劍莫屠龍一身飄泊定何所萬里征途長憶汝
丈夫意氣交相深屈沱芳草徒延佇

望歸州適遇州太守蒞任之始遙寄

客路傷心戎馬餘秭歸城邑半丘墟鴛鴦石枕浮雲暗
鸚鵡崖含落照虛世亂乍時銷劍戟民貧無計問詩書
新來太守驚年少何以經營荅里閭

渡方灘

險峽阻危灘驚流上更難人蹤懸樹杪纜道絕雲端風
急水連雨沙澄石似丸十千傾斗酒不散客心寒

甲戌自方灘踰渣灘南去渣灘高方灘低水落則方
灘峻嶮難渡至春漲則渣灘波平舟行無慮猶星灘
之與月灘也西轉鸚鵡崖爲羊肝三繫處經老蛇窩
盤流來觀十餘里達月灘之東巨石橫枕西望則
則石笋紛起鱗次萼附尤稱奇觀月或作拽渭南集
作業今俗稱葉未知孰是榜人牽火仗行崖高路絕
復推槩而去遡下巴斗峻嶮百重叢石崩落處相架
如屋梁土人往有穴處其內者時方季冬嚴辰肅
夕芳草暄萋正同春半蓋峽中皆如此云從此到石
門山有石徑深邃望若重門卽劉備爲陸遜兵追
急走遁處也泊舟計程四十里夜分聽隣舟簫鼓騰

沸羈愁更難堪矣得詩五首

通除巴東道中

殘年一日復兩日後日今年是舊年楚甸東分纜入峽
蜀門西溯更登天龍泉未接張華佩馬齒頻催祖逖鞭
悵望高堂應夢斷倚閭深夜倍相憐

巴行卽事

輕帆輒浪掛微風兩岬山高倚碧空處處石岬人結宇
真驅雞犬入雲中

題石門山

翠微深處石門開漢主當年匹馬來王氣至今天地合
赤龍猶護彩雲回

懷天榆黃先生

二首

遠遊曾作賦大雅竟誰陳吾道應難貶人情或厭真淹
留三峽雨飄泊五湖春遙憶柴桑里相携漉酒巾

夙昔河橋別因君賦五噫文章爲世賤蹤跡向人疑歷
歷白榆晚萋萋芳艸期只今迴望合笑我漫臨岐

乙亥晦遡上巴斗出牛口過磨刀灘相傳漢壽亭侯
磨刀處也中流俱阻嶮石水激難行共程十五里抵

巴東縣泊舟縣無城郭之險僅茆屋數十家倚山結
宇而已山爲巴山又名金字山一峰分三岡下形如

金字縣治依之亂餘室廨俱委瓦礫因訪信陵城秋
風亭故址兼謁寇萊公祠遺老盡矣可勝歎哉步歸

惟見土人咸塗墍其門戶剪綵爲旗分插左右下列
二炭稱將軍以辟邪青風俗固殊焉薄暮爲賴二虞
深招集銀鐙擁樹羯鼓飛花長夜懽娛不自知其醉
態之交橫也是日得詩九首

題文石

應是神仙種光華四照開縱非鬱林至猶向錦川來是
石輝珠玉非星落艸萊米家書画舫同載不須猜

巴東獨步口占

四首

金字山迴巴水長將軍炭上彩旗颺何人不說迎新歲
獨我扁舟是異鄉
客裡嚴程夢裡家題詩也學度年華只憐江水明如鏡

偏照征人兩鬢花

久客辭家淚滿巾天邊更見歲華新故園兒女應長大
曾念巴東守歲人

短褐孤征霜露寒隔年書寄老親看天高蜀道無時達
那得頻開堂上顏

巴東除夕

四首

今夕是何夕天涯逼歲除梅花違驛使栢葉到行厨舟
檝雲山嶮星霜鬢髮疎滄溟東北盡燈火憶吾廬
萬里趨江峽孤篷問綵衣誰知新序改尚與老親違樹
雪融春近灘冰帶臘歸獨憐遊子住蜀道望依微
賴有良朋在張筵壯客遊不揮它國淚暫緩一時愁翠

竿分殘醕銀鐙擁敝裘夜闌簫鼓亂飛夢繞朱樓
 不惜勞行役頻傷歲月徂乾坤雄顧盼兵甲賤頭顱才
 豈推詞客狂猶混酒徒明朝春復至此夕倍躊躇
 歲丁未孟春月在終陬□□□丙子朔同人交賀畢
 卽盤鳥道上巴山謁漢壽亭侯祠晌午微雨作暗篷
 獨坐惟與詩卷親也遇重慶人下楚之便因爲寄書
 一慰北堂得詩五首

元旦巴東道中示同舟諸公

荆山巴水並仙槎簫鼓聲中啟歲華萬竈煖融江樹雪
 千帆晴放峽門花案分彩筆詩連帙尊倚椒漿客是家
 我本趨庭懷鯉對莫猜浪跡向天涯

巴東寄書 四首

巴峽迢遙雨雪霏書從天畔報親闈無邊江水東流急
 一片愁心日夜飛

薄田租息近何如老母經營白髮疎慚愧男兒萬里外
 披裘挾策兩躊躇
 孤舟雨氣動蕭森兩岸青山客路深行盡楚江纔得半
 猿啼何處不傷心
 艸色新年掛客裝秋風亭下木蘭艤數行書寄千行淚
 直向巴江下浙江

丁丑自青竹標灘過東瀼溪卽少陵寓居處也兩山
 忽斷沙渚上茅屋數十家有溪泉入江淙淙不絕里

許爲西灤溪兩崖石勢詰屈如老樹槎枒根盤節錯
溪闊丈許較東灤略曠下俱五色石分映澄波澹
浩若乘空若炎夏火流輕舟委浪長歌濯足實可憑
衿矣按少陵寓夔凡三徙居有灤東灤西又有東屯
東屯離此尚遠在瞿唐關東放翁云屯有李氏者居
已數世上距少陵財三易主大曆中故券尚存又盤
雄灘毋灘而上高山聳起插入天半爲建陽峽屬興
山縣源出寧都十餘里間曲折四十八渡計程二十
里得詩三首

巴東蚤發

鄉關望更遠巴蜀路猶難誰道春秋富徒憎衣帶寬荒

雞鳴峽雨瘖鷺立溪湍落盡梅花曲臨風欲罷彈

經東西二灤

二灤限東西江村空鳥啼古人不可問好句共誰題蹤
跡留天地年華送鼓鼙只看溪上艸雪盡半萋

欲辭賴二濟先行漫寄

握手憑軒歎夜除今來又是歲華初客愁不爲郢筒酒
旅食寧懷丙穴魚同我瞻雲情漫切前君鼓柁意何如
請看天半峨眉雪已映高堂白髮疎

時虞深亦省觀合江同舟西上

戊寅自門扇子南上石勢橫溢如獅象搏擊而至其
文則菱角堆雕盤中嵌空玲瓏崢嶸萬變至於層峰

插雲與天絜勢者更無計焉盤楊家蓬遡卓牛沱至
楠木園頗聞雞犬聲臨江石壁高擁戟張劔齒森然
相向經洪厓磧也平舖西崖之下廣數畝五色石斑
斑漾澄流間望之目眩抵萬流驛山俱自下趨上不
復東向古者占地勢殊省會從此楚蜀分界矣其石
色又變黃鶴山樵嘗法之爲牛毛披麻襯蓋巫峽也
此爲中峽疊嶺雲霧奇峰霞舉林嵐披薄籠絡群山
之表凌高降深杳然莫測其峻焉再上爲香爐灘亦
名皮石蓋以層石如皮比然因携客上灘緣危石行
二里許始見十二峰按趙子昂詞曰望霞曰翠屏曰
朝霞曰松巒曰集仙曰聚鶴曰淨壇曰起雲曰飛鳳

曰上昇曰登龍曰聖泉積翠凌空與天無際爭奇標
秀各不相下首尾一百六十里間來者目不周翫情
不給賞水經注巫縣之東北三百步有聖泉謂之孔
子泉其水清潔下注溪水南入于江也又蟠大磨小
磨見望夫崖也上一峰儼然美女獨立凝睇若有所
思者或曰望夫卽十二峰之一子昂誤爲望霞耳相
傳每八月十五夜月明時有絲竹之音往來峰頂山
猿皆鳴達旦方止山半又有石壇平曠爲夏禹見神
女授符書處南崖峭壁絕高忽有一竇橫通天光明
明若月掛峰頭者俗稱擔穿巖渭南集作夫子洞過
此有三分水也凡三穴分上中下懸流不竭今止中

下有水矣停舟烹茗正復佳興渭南又謂此泉俗占
豐稔三派有年兩派中熟一派或絕流則饑饉然在
放翁時亦止見二派有水可見上穴之涸已非一日
矣俗占固不足信是夕泊舟其下迤對曰霸王鋤計
程八十里得詩五首

入巫峽

三峽分雄鎮巫山望更高天空垂一線水斷接纖毫客
淚猿聲急鄉書雁影勞無端神女夢曾不到輕舸

巫山十二峰望神女廟

東南佳氣散層霄萬仞芙蓉掛沈寥錦樹秋飛珠佩近
石屏春轉玉臺遙乍疑舉袂雲連雨却道含情暮復朝

采芣涉江花落去最憐無路報瓊瑶

題望夫峰

巫山高擁蜀門孤片石何年化望夫風急烏髻吹樹斷
月明紅淚照崖枯秋心有路通雲雨春色無情咽鷓鴣
我亦東南頻極目區區私愛愧羅敷

三分水

水亦三分去流聲與客同吳門綵服遠蜀道鯉庭空浮
梗難依木飛禽獨遡風湯匕愁日暮蹤跡乍西東

霸王鋤

浪跡真如鷺扁舟到蜀初不聞神女珮空見霸王鋤雪
艸迴春細冰泉照夜虛欲投烟裏宿何處問樵漁

已卯自霸王鋤發舟霸王鋤以石上有半凹似鋤墾
而成者故名繇此過老鼠湊鬼錯路山水嶮惡惟官
家坊略有人烟至跳石尤險寸進爲難越此則爲羊
望子迷猴子空亡沱朽石子無非行路之難令人心
瘁或曰空亡沱卽筮篋沱也治西又有琵琶峰巫山
志筮篋屹左琵琶峙右蓋狀其津隘矣計程二十里
抵巫山縣也臨高山下俯大江比屋數十家鬱然在
望泊舟對江沙址夜半酒醒聽城中簫鼓喧闐與灘
聲相亂得詩二首

題鬼錯路

猶傳鬼錯路人到竟如何黑石蟠青蜺黃茅浸白波日
微窺冥漠天小落嗟峨寄語征途侶輕生莫浪過

泊巫山縣卽事

桂棹蘭橈蜀水分西來城郭望氤氳琵琶峰掛窓前雨
灑瀕堆飛樹杪雲新長兒童喧竹馬初歸婦女颺羅裙
夜深只有灘聲急孤客愁心不可聞

鏡架灘

庚辰越流石出麥沱及鏡架灘達下馬灘也形如半
月舟行展舒爲難榜人牽挽而上僅六里得詩四首
江明流寶鏡山翠逼空來雨色留神女風光接楚臺琅
玕應在篋玳瑁莫成灰只有征人焰梅花鬢裡催

夜愁二首

巫山巫峽擁灘流萬里征人一夜愁
夾岬猿啼催鬢白
那堪離別更孤舟
相思遙隔彩雲深
腸斷孤燈醉後吟
十二峰頭織月落
猶能流影入君心

舟行有感

平生不得志到此更悽然
未是月三五難消酒十千
夢分水峽斷心並雪灘懸
咄咄看長劔凌虛欲問天

辛巳下馬灘行過玉兔崖轉月明山迥
巴里至乾焦灘
水深激篙纜俱莫能下再越拖渡子西望峽勢
忽斷兩崖相對屹如門戶爲餘倉坪來此峽仄灘長
必遇順風舟乃得上過錯開峽口吐平沙數十丈

內列石屏丹綠綺分望若圖繡頂上忽柱一峰高插
雲漢之表相傳此下有斬龍臺又蟠餓鬼灘渡大溪
口入瞿唐峽水峻逼隘而來與驚雷掣電
俱下少進有大小黑石分亘兩涯中流一線其色如
鐵聞水漲時舟行過此者皆坐守旬日云上臨赤甲
山水經作岬注謂公孫述遺蹟因山據勢周廻七里
一百四十步東高二百丈西北高一千南連基白帝
山甚高大不生樹木其石悉赤如人袒胛故謂之赤
岬淮南子傍徨于山岬之旁注岬山脇也土人則稱
火焰山上有孤城爲古魚復縣址按春秋左傳文公
十六年庸與群蠻叛楚莊王伐之七遇皆北唯裨僚

魚人逐之者是地志謂灩澦風濤電射巨魚却不得
上故名也過此更爲黃龕山水經注白帝城西江水
東逕廣溪峽中有瞿唐黃龕二灘兩崖翠嶂鬱起環
列如屏者曰臺閣子稍上俗稱孟良梯懸崖絕壁之
上方孔俱鐵槌痕參差可數百孔下有碑勒天子萬
年四字事莫可考按水經注晉益州刺史鮑陋鎮此
爲譙道福所圍城裏無泉乃開水門鑿石爲函道上
施木天公直下至江中有似猿臂相牽引汲然後得
水此或其故跡也又上古堞如帶迴合荒茅間其城
凡三一曰下關城相傳楊六郎瑾下三關處上有關
索夫人鮑三娘梳妝臺下有鐵柱二上勒元至正年

月蓋元朝於此鑱江征客稅明季因之今移稅重慶
柱僅空立耳土人誤爲張桓侯所置且以城上石臺
爲桓侯擂鼓臺非也一曰白帝城公孫述建城內尚
存明良殿遺址一曰子陽城子陽卽述字也此城在
山頂較白帝城更高至此三峽盡矣灩澦石獨當其
口灩澦水經作滄預高山水面二百餘尺周亦如之
諺云灩澦大如象瞿唐不可上灩澦大如馬瞿唐不
可下余竊疑之或曰蓋謂水發時也如春夏間灩澦
沒入水中僅如馬如象則舟人不敢進故亦稱猶預
石蓋言舟子取途不決水脉方猶預也風急泊舟計
程七十里得詩八首後讀徐詡記三峽蓋有二焉自

揚子閣集 卷七
三
彝陵西上南津入西陵峽再爲明月峽黃牛峽一百里許此楚西之三峽也之南門蜀江之委尻也上溯歸州繇巴東入巫峽再經巫山入鬼門關爲歸峽再上瞿唐峽連亘七百里此川東之三峽也之北戶蜀江之咽喉也他如歸州之空舫靈芝兵書南陽巴陽風箱興山之建陽巴縣之温湯又有明月涪州之奚龍木洞驛之青艸銅鑼魚洞驛之黃山雒黃皆以峽名然非三峽之壁立矣紀此以備考

入瞿唐峽懷古

君不見瞿唐古峽高無極百仞飛流天偏側猩也日夜抱子啼飛鳥廻翔難得食問汝何事扁舟來萬里橫衝烟霧開手提三尺芙蓉劍磨向空江濫灑堆濫堆寒江水竭臥龍躍馬俱銷歇男兒短褐淚長垂天地無情虛歲月歲月蹉跎年復年鷓鴣華如艸亂春前平生最是興亡恨到此瞿唐更黯然

題黑石

何年分鐵石峽裏鎖瞿唐灘咽江聲細天孤日氣長猶疑埋劍戟深恐臥豺狼畏爾不能去悠哉懷故鄉
赤甲山望魚復古城

赤甲風高野燒平黃茅不引鷓鴣聲傷心日夜岷江水流出山頭魚復城

望白帝城

扶桑閣集 卷七
躍馬提戈霸蜀西何年帝業竟淒迷白龍已逐江雲去
青艸空隨粉堞齊戰伐至今懸涕淚旌旗自古拂虹霓
無人刀尺催寒夜只有狼狽夢裡啼

梳粧臺 二首

百尺梳粧臺凌空江上起香風飄至今日暮落秋水
不見芙蓉花江光渺無極流來錦水波猶炤胭脂色

題灩澦石 二首

灩澦孤堆鎮峽流飛來倒影入船頭莫言澈底深千尺
不鎖征人萬里愁

東西高擁萬峰來翠結仙人碧玉臺一線江流天上盡
彩雲輕放峽門開

卷七終

扶桑閣集 卷八

日觀山人朱爾邁人遠纂

西瞻詩 四

壬午抵夔府訪沈司李詢八陣圖故處在東門外魚
復浦上相與登城遠望沙磧內叢石凡八大聚此外
小聚數十皆粲若列眉及循城而下至其地則又模
糊莫辨也土人因進曰前神宗朝有徐太守者見而
詫之盡平其堆次日石聚如故又有里人廖國賓于
夏日取磧上一石爲枕夜臥聞石中有更鼓聲破之
內勒數行云八陣圖定更石某年某月某日遇廖某
破此石其靈異更彰者故事每年正月一日至十

五日傾城士女俱出遊磧上謂之踏磧拾小石之可
穿者名種子石婦人繫於釵頭以爲一歲之瑞今不
可得見矣按記武侯八陣圖凡三在新都牟彌鎮者
一百二十有八當頭陣法也在漢中沔縣定軍山下
者二百五十有六下營法也在夔府者六十有四方
陣法也楊用修亦謂八陣圖在蜀者二夔府蓋從先
主伐吳防守江路行營布伍之遺制也凡八行二十
四蒞新都爲成都近郊則其恒所講武之場也其地
象城門四起中列土壘約高三尺云繇是入東門北
望鬼門關也爲山水阻險黃山谷謫涪經此有詩鬼
門關外莫言遠卽此稍上爲白雲樓故址相傳樓三
層登覽之勝甲一郡今不存再尋永安宮也舊改府
學卽武侯受先主遺命處也宮前龍柱尚存至于少
陵之宅已入軍營甘夫人之墓蚤埋府治雖臥龍岡
下猶傳武侯遺廡在焉然毳幕高張旅人却步于是
再過司理署中傾尊酒烹陽魚對白鹽赤甲諸峰一
話故鄉不覺漏下沉也矣余謹按夔蜀之咽喉也扼
以瞿唐鎮以灩澦一夫當關萬夫莫奪古者岑彭之
入捍關桓温之遡魚復朱齡石之次白帝明廖將軍
之破瞿唐皆于此方略焉是日得詩六首

八陣圖

永安王氣未全無荒磧猶傳八陣圖
龍虎畫盤巴樹直

風雲晴捲蜀山孤
臣心生死懷存漢
國祚興亡恨失吳
江水至今流不轉
難憑山處問吾徒

八陣謂天地風雲飛龍翔鳥虎翼蛇蟠也杜公詩江流石不轉遺恨失吞吳

白雲樓故址

白雲廢閣日初斜
何處當年十萬家
無復珠簾捲蜀錦
漫留毳帳咽邊笳
望懸帝子城頭艸
淚擁夫人墓上花
夜半杜鵑啼不住
客愁非爲滯天涯

過永安宮懷古

永安宮闕黍離同
漢室君臣在眼中
受命數言垂宇宙
出師千載負英雄
玉龍捲霧迷宵月
石馬嘶秋斷曉風
我有臨岐多少淚
紛紛吹起逐飛蓬

尋少陵遺宅寄荅吳震

長公錄別詩有鞍馬若經杜甫宅
持觴爲我少遲留之句
按渭南集瞿唐關東卽東屯少陵故居也
今無考府治內有詩史堂亦廢

遺宅知何處
悲風起戰場
難分青玉案
眞臥綠沉槍
首菑埋詩史
駒駘繫艸堂
持觴虛夙諾
暮雨入蒼茫

望甘夫人墓

古今何處辨朱顏
猶識荒丘指暮山
玉殿總憐沉艸際
銀蠶應已出人間
不同總帳歌聲歇
好並湘妃淚眼斑
向來彩雲飛片石
惠陵西望迥難攀

臥龍崗望武侯廟

風雨傷心碧艸萋武侯祠廟絕攀躋難窺廢碣神龍臥
長倚孤城戰馬嘶八陣雄圖臣力盡兩朝顧命主恩齊
只憐山下岷江水日夜東流不向西

望白鹽赤甲

夔府誰憐客路賒白鹽赤甲焰天涯不懸塞北秦時月
却認江南晉代花光倚碧霄連翼軫影分玉帳亂琵琶
當年杜老題詩在助我登臨感歲華

癸未夔府發舟自官渡口入南陽峽蟠漫流三沱迷
魂子至安平驛七前民廬數十家烟火在望泊龍洞
宿按志龍洞溪產靈壽木云計程一百里甲申過石
坂灘廟漑子此上水勢迅急舟行峻嶮曰虎鬚子杜

詩瞿唐漫天虎須怒卽此再越青艸青軍灘出寶塔
沱到雲陽縣雲陽漢胸臆地也前臨飛鳳後阻漢成
諸山一江襟帶其間爲西蜀津要今駐兵三千戶侯
府在焉繡棟朱甍旌旗煜耀下視蓬戶瘡痍真如天
上矣西崕桓侯廟孤倚石壁亦屬新修登陸再尋杜
鵬亭相傳亭前有巨石每歲春深則子規啼其上爲
雲陽勝地白骨黃茆無從涉覽悲夫繇此上二郎灘
遡玉沱抵馬嶺宿計程五十里夜半聞雷聲得詩二
首

過雲陽縣

戎馬驕嘶落劒花柳營日暖弄琵琶試看城裡三千戶



原件短缺

扶桑閣集 卷八 西瞻詩 四
誰是當初百姓家

舟次聞雷

天心不可問冬盡忽驚雷掣電開巫峽崩雲瀉楚臺西
南民已盡豺虎路堪哀倘更饑荒歲招魂何處來

乙酉越羅船背遡夫子坎過黃連橋上有石長廣十
餘丈平枕兩岬宛然如橋故名再上爲下岬寺在
石屋中佛像俱鏤刻壁間對岬曰盤沱懸流奔駛其
上卽當年譚家磨盤砦也尚有餘屋數間可望南爲
上岬寺過癡灘子曰巴陽驛另有小溪可通達州開
縣驛前爲白鶴灘又有危石凡九堆屹立江渚者名
九堆子自此渡百小灘入巴陽峽兩岬俱巨石傾岬

十里得詩二首

峽中聞画舂

峽路難如此胡爲到好音流來巴樹曉轉入蜀江深未
敢分香稻徒然託箐林飄々無定跡同爾異鄉心

紅紗磧坐月

孤舟天半遡江湍月轉紅紗磧影寒痛飲莫愁身是客
平分笑語入雲端

丁亥蚤行繇高桅子過鐘灘相傳昔年有古鐘飛墜
于此至今波澄時猶隱然見江底云西上萬縣爲蜀
漢南浦地後阻都歷西臨西山繞麓廬屋千家俗稱
南京街頗饒過于縣治中限苧溪枕一石自然成

橋闊三丈長十丈餘曰天生橋溪泉噴薄其下如珠
簾玉棟蜿蜒南去與江合流溪之北一山崒立上綴
茆屋有人烟土人呼爲天子城亦當時譚家結砦處
也對江爲南山也之半卽岑公巖也按記石巘盤結
若華蓋左右方池松篁蒼蔚稱神仙窟卽此下臨蛾
睂磧望之儼然遠秀無比再越蝦蟆石也之北忽有
巨石虎視江上也可坐數千人名無可考倘俗所謂
眠石腦者是又自西而南曰橐石也長百餘丈橫枕
江面如橐形去里許望懸嵯絕巘之餘飛簷層起者
曰匾砦土人避盜往也居此蓋嵯高石削鳥道蛇盤
一人守險則萬人不能踰焉望之極爲奇嶮抵錫佛

面宿計程五十里是夕始得郫筒酒郫屬成都府昔
山濤治郫時剝大竹釀醪醱作酒兼旬方開香聞百
步外故蜀人傳其法自萬以上俱飲此俗稱乾咂酒
以糟粕貯甕內臨飲時灌以百沸水插蘆管其中或
五人或十人叙次而飲也一杯則加水一杯以味盡
爲度約糟一升酒亦如之頗香甜不負少陵與丙穴
魚並稱也或曰不然郫縣西三十里有池也內產蓮
花上繞綠竹數萬竿左右二井左曰鴛井右曰鴛井
土人先截竹爲筒取鴛井水貯之以蓮葉爲蓋纏以
藕絲掛鴛井中七日夜便成旨酒今池竭竹枯不可
得矣及讀華陽風俗錄云剝其節傾春釀于中則信

宿香聞此其說近是故商隱詩錦石爲碁子郛筒當
酒盃也是日得詩六首

過萬縣望西山書感

西山寇盜幾兼并南浦猶傳天子城路轉雲岑空躍馬
江分茅屋更棲兵羈愁半繞旌旗暗殺氣孤懸艸木平
父老何人留骨在亂離今已愧儒生

題苧溪天生橋瀑布

飛來片石苧溪雲白石危橋百丈分地轉虹蜺天上落
城臨風雨日邊聞金銀倒影神仙窟竹樹深棲麋鹿群
坐久不知身世隔直須晞髮臥氤氲

望岑公巖

是處俱兵甲仙人不再來蒼松難作兩白石幾成灰沙
擁開金埒雲寒蕩玉臺客行當夜靜笙鶴重徘徊

蛾眉磧

何事蛾眉磧涵空掛夕流波搖明鏡落雲拂彩衣浮寂
莫文君去依微神女留客中無紙筆畫不到朱樓

得郛筒酒兼懷陳昌二首

子棨錄別詩有聞說郛筒能醉客川南應作故
鄉看之句

紅樓花落釀醪醲曾倒山濤白接籬此夜春風入萬里
直教醉殺月明時

甕裡初開百步香良朋相隔月蒼也但令一醉無昏曉

今日川南信故鄉

戊子白霧障天猿鳴淒激山谷流響有傷羈情從錫
佛面上大小湖灘匕水峻阻幸遇順風南去杜詩不
是怕湖灘卽此霧霽歷插柳灘遡灤途驛爲送客堆
麥隴青匕春光將及行旅過矚更難堪矣再過上磨
刀灘出雙渠子泊舟計程五十里得詩二首

曉霧

孤舟憐曉發濃霧接層陰江闊魚龍混山平日月沉權
歌移遠磧猿嘯隔疎林聞說新春近天涯不可尋

送客堆逢立春

經年客路厭風塵送客堆邊更立春楊柳漸舒他日眼

梅花遙隔故園人啼鵲城擁綈袍敝濯錦江含華髮新
那得彩雲垂羽翼東西吳蜀拜雙親

郫縣爲杜鵑城望帝所築錦江在成都南織錦
濯此則鮮面上有濯錦橋

已丑過武寧關遠見廬屋數十家林木隱秀及登陸
見灰燼瓦礫之餘寂無人影僅有香橙纍匕高掛樹
頭耳對江爲無風不渡處峻波壁立望若散雪從此
出老鶴磧上永安沱茆堆磧此處江勢較闊兩涯沙
石俱五色紛映與澄波相激盪再入石鼓峽隸重慶
府境兩山不甚高但頑石礫砢交積如臥鼓狀數里
爲石竇砦亦譚家舊址高可數百丈周二三里孤立
如平臺躡梯懸絙而上無徑可尋聞上有二池焉三

譚恃此爲金湯志蓋可知矣至今砦下猶繞民廬百
餘家迤對曹溪驛也屬忠州再上曰鷺鷥背曰樁溪
子人烟麥隴頗稱暄萋計程五十里得詩四首

武寧關寓目 二首

春暖江關靜碧流空濛樹色霧中收分明隔浦人家在
那有晨雞到客舟
百疊青山岼岼開空江寂莫湧潮來只看樹裡香橙熟
盡是當年父老栽

題無風不渡處

尊有濁酒篋有敝衣請君披衣且飲酒朝遊不如獨夜
歸自古蜀道之高也入青天去萬仞飛流掛山樹也杪

牽舟難更難咫尺動關生死路君獨不見無風不渡處

望石寶砦時屆燈節

胡爲一片石也寶竟流傳土鼓千門啟銀燈萬樹懸人
情嫌久客春意入新年不敢頻回首天涯月共圓

庚寅望自樁溪過淹湊子遡穿心濠中流忽沙磧橫
枕頑石委藉其上水激揚波榜人牽纜跋涉一身入
水者半再越簸箕石方溪渡爲舊忠州王化城在焉
城亦傾圯艸間頽址略見出土澇子轉土硃子兩山
人煙較多左右林木負日俯仰山之西卽西陽石砦
二土司界隸重慶府衛其地當黔播接荆楚云薄暮
泊長磧子時屆上元途經異地與同人臨江醜酒看

抄本附集 卷八
月爲燈醉後吳歌徐發聞曲間之懽情旣暢杳然不知身之在客矣計程五十里得詩二首

上元忠州道中示同人 二首

尊倚渝江月燈臨蜀道天誰知俱遠客相對又今年醉
眼雲間出春心樹杪懸空囊縱羞澀尚有十千錢
不盡東川路同遊與歲徂山含石砧遠天落西陽孤夜
靜江飛練春明月滿壺莫愁萬里外乘興有吳歛

辛卯盤東溪出拖板槽到忠州臨江負山民廬數千
家其灘上五色石斑斑成文土人因于石下取細砂
淘之輒得黃金焉繇此遡勾連磧江闊沙浮榜人牽
火仗竄身亂流中望之狀鳧沒鷗行矣再越高陰背

唐公壩上白馬烏牛二磧風水相激蕩波沸動人薄
暮因泊舟別浦上巨石綿連江面如平臺淵潭相
接縈流曲折其下延袤數里間絕似流觴遺跡爰與
同人拂衣而上流覽契集已而月出江心衆山倒影
窺之如画急呼尊酒相賞亦旣醉止清歌繼之水激
響哀冷不絕此景殊繫人思計程五十里得詩四
首

忠州道中書感末章兼懷陳光緯盛中徐全趙營

李良年陳璵沈植姜梗及從子奇齡 四首

多少浮生事胡爲萬里遊江空沉白馬山闊撼烏牛歲
酒開中月春燈夢裡樓最憐小兒女那解出門愁

此日江南路春風動蚤梅家園三百樹應向玉窓開映
 雪浮書帙隨蜂落酒盃天涯腸斷處巴水接縈廻
 地是巴渝舊賓人夾水多不知今夜月妙舞竟如何花
 落留眉黛風輕漾綺羅邨堪萬里目還向戰場過
 壺觴不可盡飄泊且江村月豈吹簫落人猶佩劍存短
 衣揮涕淚華髮負乾坤何日同心侶披襟試一論

壬辰烏牛發舟踰孟梁子出蠶子沱至水陽溪此處
 江忽分爲四路中亘石坪凡三長五六里水淺徑迷
 客舟俱從亂石中盤旋而行聞石砭司輸糧出入途
 必經此也去爲花林驛也屬忠州荒茅如戟虎嘯猿
 嘯之聲傳響空谷聞者日夕爲嘗再繇鳳凰子遡虎

鬚子灘水崩瀉扁舟搖也如一葉飄轉中流也水經
 注亦云灘水廣大夏斷行旅越九流子鑿珠背鯉魚
 沱至鐵門門宿水勢嶮惡林寒澗蕭夜半青燐閃也
 哀轉淒絕月下孤篷聽之殊難爲懷計程四十里得
 詩八首

水陽溪爲石砭司分界處
 蠻方界盡水陽溪石轉灘廻路欲迷直接鳳皇山萬仞
 果知天嶮限東西

石砭土司上臨鳳皇山

花林驛口占 四首

遲日江沙炤眼明天邊幾度預期程春風不解行人怨

散入花林猿嘯聲
驛路迢々江樹黃無邊春色帶斜陽客中有淚都飄盡
那敢從人問故鄉
一從篋底拂吳鈎兩載辭家賦遠遊愁殺江南楊柳綠
春光先我度高樓
客程無那艸萋々巴子城空蜀鳥啼只有愁中明月影
相隨獨到夜郎西

巴縣卽古巴子國夜郎地今遵義府有夜郎城

過虎鬚灘

灘嶮真無極危檣拉虎鬚氣吞巴樹沒勢走峽雲孤天
地分雄壑波濤起壯圖中流憑短楫努力在微軀

鐵門門夜泊

二首

虎嘯猿啼並客船萬山空翠湧江天最憐明月長辜負
永夜孤篷隔汝眠
滾々江聲動地來乘春暖逐鐵門開他鄉不待桃花發
一片愁心浪裡催

癸巳霧中行過高溪入麻滄灣遠望江心俱大石橫
枕隱々如伏虎狀可數十聚從此溯珍珠簾上擁高
山列同屏障其色深黯可畏屬鄆都縣界計程四十
里抵城下荆榛瓦礫見者無不墜心其地前襟大江
後阻平都山平都爲道書七十二福地之一按記漢
王方平得道于此上有仙都觀號紫府真仙之居因

携客渡石橋披茆覓路但見堦級儼然屋宇無一存者詢諸土人曰此十王殿遺址也十王爲閻羅天子後人稱幽冥者輒曰酆都今土人又傳閻羅天子于乙巳歲移蹕合江縣之審家山矣故彼處立殿一如酆都云北上過九蟒御史殿右折而升有石表曰天下名山稍進爲昇仙橋卽方平仙跡臨藥珠宮今亦零落繪像鐘磬出沒艸中又轉而南有閣三楹上無土甃風雨不蔽者曰凌虛閣下石碑林立東坡遊平都詩尚存閣後見八卦亭爲方平丹竈處臺上石棋至今歷歷可數一小碑勒後漢景龍歲七月七日紫元君麻姑會方平詩二首王子求仙月滿臺玉簫吹轉鶴徘徊一身飛過不知處山上碧桃花自開萬仞孤峰插太清麻姑從此會方平瑤觴玉液初傾後九轉工夫道已成循墻東去古殿翼然相傳仙都觀故址今改耀靈殿位閻羅天子焉端冕執圭東向坐坐下列業鏡光燭秋毫臨之慄慄門外有五雲洞居山頂深不可測位漢壽亭侯其上洞之北下又有麻姑洞中可居數百人近因荒亂恐穴奸當事者命塞之此山東倚青牛西連白鹿白鹿之半聞有來蘇亭因東坡名也寺內有吳道子畫薄暮不及徧覽促步賦歸時月出已纖矣得詩七首

舟次酆都

千秋枳縣地何日洗兵戎
山入珍珠暗江懸睥睨空金
銀埋帝闕笙鶴閉仙宮
只有王孫路青七亂艸中

平都山七下臨青牛白鹿二峰

平都縹緲掛江流傳是仙人十二樓
洞隱桃花眠白鹿亭移松樹偃青牛
瑤觴不惜千春待丹竈猶傳九轉留
邴得凌虛隨爾去吹簫弄笛到瀛洲

耀靈殿謁閻羅天子

亶聰開地統端拱肅皇年
世事輪中轉人心鏡裡懸
初生非獨夭後死竟誰賢
不盡北邙色登高望黯然

登凌虛閣二首

凌虛高閣五雲端
瑤艸金光入晝看
應是仙人留客住

鳳笙飛過玉闌干

採藥經年去海東
登臨此日到仙宮
麻姑分得桃花雨
吹落衣衫片七紅

五雲洞

王子求仙何處歸
五雲狼籍洞門飛
瑤觴玉液無消息
應笑青山事已非

麻姑洞口留題

簫聲吹轉鳳皇來
爲訪仙姑到玉臺
山上碧桃今已盡
幾時重放石門開

甲午辭鄴都出瓦子濠
過上送客堆白霧
連江稍霽卽從觀音灘
入竈門子蓋江中大石攢起
左右林立

水從中流以形似名亦稱攢窳子自此遡小百牽而西曰南沱曰北背曰鷺鷥背更越三官灘及深溪至涪州之東青驛上臨焦岨石崩墜水間以億萬計皆吞吐細石磊落爛爛遠望如焦土狀下爲焦灘水險處凡三洶不可上涪州武陵郡之西界也爲五溪蠻太白詩聞道龍標過五溪卽此地始見紫燕群飛低徊江面達平西壩泊舟計程六十里得詩

三首

東青驛口占

二首

斜陽細艸亂萋萋萬里孤舟遡五溪我有愁心天上寄風吹不到漸江西

隔江何處弄簫人散入征衣點淚頻莫道他鄉聽不得梅花也落武陵春

涪州見燕戲作艷體

江艸綠離離江花下上飛紅襟紫翼燕顧影何差池我有盈尊酒爲汝傾一卮一卮不盡飲長跪問佳期在何許乃在江南滑江南春信早汝來應見之高樓夾繡戶簾幙映呆恩井上桃花發楊柳半垂絲中有愁思婦宛轉流黃機銀梭亂素手織縑無尺餘昔作深閨女今爲蕩子妻擲梭三歎息緘怨申微辭離居日已邁怒焉如調饑那得並弱羽凌風入中懷中懷從風歇竚立空徘徊

乙未雨發過百遂三灘越大百牽以石名者曰和尚
曰鐵匠曰三跳以子名者曰門坎曰雞喉曰三堆曰
高廟俱叢石糾插望若崩雲更從斗岷遡群珠到涪
州爲古巴國地也遠雙江一入蜀一通貴州思南府
城如彈丸新起民廬四五百家荒涼動目泊對江計
程五十里得詩二首

曉雨

春溫帶雨飛獨客去何依石響山泉亂林浮江樹微詩
書當有道瘴癘到無衣轉覺鄉愁劇難爲綠艸菲

涪州道中

楊柳天邊樹征夫未忍攀雨遙三楚戍春入五溪蠻犬

馬分新歲漁樵失舊山莫彈行路曲吾道在間關

丙申涪州早行過荔枝園上李渡遙望林木交合纓
帶山阜似有民居數百家因登岍一訪遺風顧見雕
墻華壁之下野梅亂開芳艸無主可勝痛哉出大渠
濠抵五布鎮計程五十里得詩一首

李渡見梅花作歌

昨歲家園梅亂開玉壺春酒幾啣杯醉裡詩成花下臥
酒徒日已看花來只今飄泊遊西蜀買酒江村苦不數
縱然得酒也吟詩那得梅花開繞屋去歲今年人不同
花開花落亂離中何人對花不飲酒誰家花下無春風
獨我相逢當客路野梅無緒埋荒霧天涯淚滿酒尊虛

乘舟又復東西去少壯須臾老大過虛傳李渡看花歌
寄與故鄉好事者有花有酒莫蹉跎

丁酉榜人牽火仗涉水行到蘭市上見孤峰突兀叢
木從秀間有廟爲女真觀水激舟遠未暇捫碑出紅
眼磧越青崖子見犀牛望月石是處石勢隆起皆骨
角形中有一石忽騰躍而上長丈餘似犀牛轉睛上
嚮者再西爲寒石好事者鏤二人其上曰寒公寒姥
舟過往匕燒紙錢與之踰橫梁過馬盼堆兩崖相逼
江流漸紆曰黃艸峽匕長二里不甚高唯見林木蔭
藹傾山蔭瀨麕鹿接跡猿鳥流聲榜人因慨然進曰
當年全盛時人烟舟楫一望如雲不過十年零落至
此達燒丹背上連磧爲不語灘相傳舟至此人或多
語則水勢噴湧過此遠望石亭隱匕卽長壽縣匕治
迴合群峰民廬數百家驛曰龍溪至臺盤子泊舟計
程六十五里得詩三首

黃艸峽

傷心黃艸峽烟火望中非尚擁頽垣在主人何處歸
鷺窺石穴離虎嘯漁磯只有梅花發臨風向客飛

不語灘

不語灘邊萬里舟桃花溪水接天流征人多少傷心語
相隔誰禁脉匕愁

長壽有桃花溪

長壽得文石志喜

誰道明珠暗裡投
龍溪驛路寶光浮
我來不望金銀氣
滿載應誇萬戶侯

戊戌縣石鼓子田家沱出養蠶堆
下湍水尋丈榜人牽火仗上扇子壩
至藏鬼洞積石交枕崩流衝瀉
船輒飄漩而下如疾風之亂籜
幸得推輓凌險西行過石門溪渡
青溪壩瞥見石笋攢錯濫
若芙蓉出水蒼翠逼來令人咄
不已又越雀石子遡樂磧乾堆盤
大洪崗走崗下有一溪北去通墊
江縣爲大洪溪
口石磧橫亘斷續相接者曰金雞關
曰編塔鎮泊舟計程五十里得詩一首

留題蟠桃石

并序

青溪緩步賴二俊偶得文石如拳上綴蟠桃者
三枝葉花蕊粲
可數余心竊愛之歸舟索觀早爲擲水矣
嗟
天下遇合之難寧止一石哉
種石瑤池上來從阿母家如何逢雨露旋復委泥沙
遇合元無主浮沉未有涯且須珍重在散作赤城霞

已亥霧中出金雞三背上百丈梁遠望人烟相接處
可數十家孤出樹杪者曰木洞驛
屬重慶府巴縣過馬嶺越當山峽爲雞公嘴山下曰明月沱
西上江水南折浸爲巨澤可數十畝許曰蔣池或曰斬軹不知何義
過江叢石崩擁曰老蛇堆又經魚子沱
上

山勢排空搏獅舞象而起懸泉分纒如白雲帶山泉
之旁老石盤結儼然數百年老木霜皮剝落者而芳
艸繇濛沿流含綠行旅所經鮮不徘徊忘返稍上南
望孤堆崒立杳然有不測之嶮曰餓鬼堆相傳舊歲
長壽令柴君過此舟竟失利悲夫再踰長陽溪歷玉
沱見侯府船推二十二槳而下聲勢動人真與花卿
絲管同作天上觀矣歷野硃崖南臨焦石子灘水大
險中流俱亂磧橫枕里許內撓纜並用數十人耳目
應接一舟而上若有未暇者野硃之西更曰野驪曰
廣陽石色奇變玲瓏萬狀倘移置江南都堪作米家
供計程六十里得詩一首

夜泊口占時得文石頗富

天地乍休兵扁舟孤客行猿啼山月苦人語夜潮驚花
遠辭梅使春溫綻柳營敝袍空抱璞不敢換秦城

庚子盤臥龍堆越烏壩入銅鑼峽七勢較黃艸明月
略高僅里許適遇順風飛帆直上出峽有石岬嶒嶸
湧起崩岬如蓮花者曰蓮花背經上下昭陽及龍灣
羊壩榜人俱牽纜行上龍床磧鷓鴣堆轉江北嘴到
重慶府計程四十里城之南倚山作障嶮峻特甚記
稱重慶地勢剛險三江之會三江蓋謂岷江巴江涪
江也岷江經府境下涪江巴江在府城東閬水與白
水合流曲折三回如巴字故名北上至保寧府通蒼

溪縣涪江在府城西北自合州來復從海棠溪過朝天門蟠城至出奇門下爲洗垢灘匕水險峻巨石臨危一舟誤入沸波間舟石相抵捍如雷轉山騰幾不免余與客援引而上少頃風至舟忽乘犇西去幸矣越此曰金子門匕外有石高十餘丈特立江岬曰金子石泊舟得詩五首按楊新都謂江自荆門至嘉州名灘險地不一而其載于字書者可得其略洞疾流也如達洞之類水流沙上曰瀨如和尚瀨之類水出尾下曰瀆如七瀆之類回流旋轉曰漩如南沱三漩之類石磧水淺曰磧如上磧下磧之類水疾崕傾曰礪如閻王礪燕子礪之類灘磧相奏曰林音子如石

梔子折洄子之類水如轉轂曰漕如野豬漕之類水漫不流曰沱如屈沱慢流三沱之類潭下急流曰灘其名尤多不盡書也又熊相曰中間若十二背向陽背夜义背兩厓俱滑石而浪尤洶湧不可楫以綽匪篙卽人背之故曰背也或曰與舟相背也峽者狹也又曰山夾水曰峽也

渝城渡海棠溪匕向爲渝人冶遊地

溪頭行樂處車馬相偪側踏青二月天芳艸敷春色新歌賓女傳妙舞巴童得金壺白玉觴少長競雕飾亂離今莫同花飛淚沾臆

紀夢四首

萬里尋親去故園庭闈兩地缺晨昏春風幾度天涯夢
飛上吳門更蜀門

蜀門咫尺到青天更望吳門天外懸夢裡如何來復去
柴門五柳望依然

男兒一劍走風塵那計梅花故國春只有傷心夢裡淚
青袍長負白頭人

萬重山翠落啼鵲催起春愁劇可憐依舊夢迴孤客路
巴江花月夜深船

辛丑從出奇門入重慶府民戶數千家鬱然可觀復
遇巴縣張明府薪軒柝握手投分懽若平生兼能脫
驂俾得從陸路行早遂趨庭之志得詩五首

三峽歌 五首

送郎下三峽輕橈急槳飛青雀望郎上三峽經年不見
一書札郎如鐵心肝妾如迷魂子上隨風蝶九子石二
郎灘無風不渡也尤難巫山鬼錯路花林鐵門門郎得
塵沙一夜吹成白也道與郎長壽直到老

鐵心肝在歸州迷魂子在夔府九子石二郎灘
在雲陽萬縣上流有無風不渡處鬼錯路在巫
山花林驛屬忠州上有鉄門門長壽縣名屬重
慶

君不見黃陵廟三朝復三暮十步九迴棹又不見灩澦

危風濤日夜如驚雷金巴斗上飛白鷺只看猴子迷歸

路看今竟不歸置得荆門多少貨寧可銅錢堆裡眠七

姐妹處且勿去

金巴斗白鷺鷥迷猴子在巫峽下流銅錢堆在夔府歸州有七姐妹地

青艸沱黃艸峽十二峰頭雲雨作處多風波狼頭與

鹿角郎今欲上難更難幾時得到金雞關上有蛾眉磧

下有鏡架灘郎若經過此如見妾容顏

青艸沱在雲陽黃艸峽在長壽黃牛峽上流曰狼頭曰鹿角其最險處也金雞關亦屬長壽萬縣對江為蛾眉磧鏡架巫峽內難名

妾腸百結復千迴正如大磨小磨日日江上轉江水不

肯從東回郎今在何處應在插柳灘頭送客堆胡勿早

旋歸

大磨小磨在巫峽插柳灘送客堆在萬縣上流

妾有心郎應知郎有約妾志之勾連磧上重相期妾若

負郎罰遭餓虎郎若負妾上山背土發誓香爐灘跪告

寒公與寒姥如何一去隨飄風妾意郎情西復東雲陽

將軍廟艷都天子宮手把瓣香咀還擲峰頭枉作望夫

石

忠州有勾連磧瞿唐峽內有餓虎灘艷都有珍珠簾相傳陰司罪人負土處蜀人每以遭餓虎背黃土為誓詞香爐灘在巫山涪州有寒燒石雲陽張桓侯祠艷都關羅天子宮每歲蜀中男婦必往禱之巫山有望夫峰

壬寅策馬西上從金子門過南京門一路俱高岡峻

嶺鳥道盤曲到佛圖關七臨斗崖秀出萬山間中崕

忽斷如門稱府西扼塞云再上曰二郎關曰通木關

其山崇峻無比人烟絕少經龍洞七處高巖之下廣

不滿丈上下則踰之迤西池水一泓曰龍溪兩際翠竹千雲蒼松隱日其下往見廢井遺白蓋當時民居也再去溪橋蜿蜒新桃試花室宇依然主人如在而青苔白骨悽斷如何下春抵白市驛宿計程八十里得詩二首是夜大雨雷震或曰天鼓

馬上口占 二首

行盡風濤客路艱天邊南上更三關馬蹄不問長征苦

迴合青雲萬仞山

青艸朱門見幾人流鶯啼轉歲華新溪橋日暖桃花樹依舊東風放早春

癸卯早行過鳳山舖至走馬崗易馬經土木槽日已

近午因折竹作糜少憇入璧山縣界馬路新闢竹篠樹根猶蟠結石砌間束步難行惟見高嵯孤立上無艸木者璧山也自此而南溪橋如帶野花亂開流鶯宛轉其間曰來鳳驛遠望銅梁山翠黛斑剝連綿百餘里爲誦昌黎負米銅梁之句輒依然久之經帽子舖渡石溪至高古墓投宿戍堡爲當時民間廢宅云其石墻雄峙碧池雕砌俱出沒艸萊尚存華棟半間問其主人不知誰氏計程八十里得詩三首

璧山道中 二首

雞犬雲屯信渺茫洞花嵯草失仙鄉只留黃蝶閑無賴蕩漾春輝度廢墻

迴合溪田白骨平
饑鳥啄_匕向人鳴
可憐屋下春風改
不復青山有哭聲

宿廢宅

日落風微客路長
誰家亭榭入蒼茫
石泉尚引芙蓉沼
竹樹虛穿玳瑁梁
兵甲連年悲喪亂
主人何處訊行藏
可憐夜_匕花間月
猶焰當時歌舞場

甲辰繇馬坊橋過新橋鋪時大雨傾注征衫淋漓上
下高嶺間病于磬折踰鐵山坪石佛鋪抵永川縣_匕
處群山之中石城傾圮僅見古木參天叢篁間之其
下井臼依然豺虎出入無復人影至縣治前始得從
荒茆隱_匕中微聞人聲徧訪之尚有十五戶初從土

府歸者計程八十里得詩一首

永川道中

天上愁難寄
人間路轉迷
只看白骨滿
相藉艸萋_匕衆
鳥喧人影孤
雲戀馬蹄平
生蕭瑟意
到此不堪題

乙巳晦永川易馬入土硃鋪渡雙石橋_匕臨大溪_匕
水迴折下映芳艸泓然綠漲再南曰耗子溝曰牛衣
鋪曰丹石坡有石孤立大書棠城境卽今大足縣界
也過郵亭踰石盤見古碑立荒艸中爲香桃仙嶺又
過菱坎出峰高驛梧桐鋪抵榮昌縣荒殘更甚民廬
不過十二戶雜處箐篠杞棘之下憑矚尤難計程一
百二十里得詩一首

榮昌

蜀門亂無象豺虎日相尋千里絕人影白骨撐如林
來悲岐路疲馬空駿匕朝行濁水泥暮宿惡木陰井白
依然在藤蘿恣荒淫榮昌古巘邑城郭半銷沉寥匕十
二家望若辰與參父老前致辭聲絕慘無音長男經戰
死少婦被生擒中男纔十四役夫更難任死者長已矣
生者徒傷心舊年刈麥歸有子持作羹今年少人種溝
壑邀餘生樂哉城上烏雙飛復雙鳴渴飲山下水饑啄
水中萍匕枯山水竭汝命將安營

仲春月在極如□□丙午朔榮昌易馬從臯池踰石
巘抵磁窑少憇宿雨初收衆山滴翠飛花亂蝶拂馬
而來晌午繇來同新亭到隆橋驛入叙州府隆昌縣
瘡痍未起瓦礫如山其民亦不過十二家與榮昌等
計程一百里得詩一首

入叙州府界志喜

行匕重行匕將父來萬里什九水中央什一空山裡舟
楫四五更策馬未暇止饑渴吾固諳容顏不可理仰眎
天邊蓬俯舉江上蒞隨風任飄颺濯向清匕水小艸念
本根况乃遠遊子遠遊非不傷故鄉非不美嗟我白頭
人六載達甘旨慷慨情內摧努力加鞭箠烏得乘雲翔
歟忽從西指

丁未隆昌易馬從茆壩至周家寺匕孤立艸間不蔽

風雨再西爲芙蓉坎屬富順縣界每見民廬從起粉
白堊青鴛瓦鱗比其下茗甌碁局几席雜陳尚宛然
如家人相對狀而雜木往也穿屋直上大堪抱矣悲
夫蟠白陽渡觀音橋至鰲溪也闊丈餘上臨石碑書
宋朝議大夫李公文淵讀書處東流與金川合金川
一名中江源自漢州流過縣西至瀘州入大江其石
堆高出水面分布兩層前三後七亦謂之三台七曜
石云渡此入縣署計程一百二十里得詩二首

渡金川二首

秋水乘橈溯蜀天誰知春半尚金川趨庭萬里非容易
一片愁心滿渡船

亂餘風景最堪憐遠水孤城掛碧天風起桃花飛片也
猶看春色似當年

戊申富順易馬出西門繇富山渡真溪驛過虎笑有
石凡五六高廣十餘丈壁立艸中作傾仆狀復踰斗
子嗟也勢峻嶮路直上也下懸絕來去者咸攀蘿凌
高尋葛降深卽之猶爲目眩西屬南溪縣界再上曰
牟亭曰飛馬曰觀音舖抵石橋戍堡中宿計程一百
里得詩一首

真溪

春風吹客遠萬里渡真溪芳樹纏鶯語飛花亂馬蹄徒
然依戍堡何處問耕犁慨慷經時意深慚到蜀西

已西繇黃沙鋪達龍華山息馬一望山原往也
有耕犁開荒者出瓦子鋪屬空賓縣界再踰黃葛鋪過高
坎至白沙升陟三嶺間遠望孤塔突兀嵯際其下即
古夔國地也從舟渡汶江入叙州府拜老父于水心
署悲喜兼至如在夢中爲誦少陵詩喜心翻倒極鳴
咽淚沾巾不覺爽然久之計程一百里得詩四首

戎城省觀四首

桃花紅綻柳條青燕也低飛繞画屏小鳥只看頻喚子
勞人何幸得趨庭六年宦跡心猶水萬里鄉愁鬢欲星
同是承歡臨劔閣獨慚張載昔題銘
官署春風竟日閑門餘芳艸不須關星臨七嶂浮蓉幕

地控雙流靜獠蠻酒債尋嘗分薄俸詩筒猶喜傲名山
卷舒雲物無心在好護衰年柳下還

叙州南枕七星山東合兩江兩江者一自馬湖江來一滙錦江雅江平羗江自嘉定州來至此合流東下赴峽也烏蒙軍民府隸叙民凡三種一曰裔人一曰羅也一曰土獠蠻

客裡風塵敝鷓鴣邨堪憔悴苔高堂吳門別路春三月
楚國經心淚幾行樹引馬蹄開遠瘴人隨鶯語變殊方
應知尚有潘輿待倚徧蓬門望眼長

止溪也水白雲深丘壑經營直到今尚有遺民能載酒
雅知傲吏善彈琴西隣鵝鴨通漁浦北舍烟花繞竹林
曾憶舊時歸卧處滿牀詩卷費高吟

西瞻詩卷八終

西瞻詩總目

五言古體	九首
七言古體	二十八首
五言近體	一百二十三首
七言近體	七十三首
五言排律	二首
五言絕句	三十二首
六言絕句	四首
七言絕句	一百二十七首

西瞻詩集 卷八
 五言古體 九首
 七言古體 二十八首
 五言近體 一百二十三首
 七言近體 七十三首
 五言排律 二首
 五言絕句 三十二首
 六言絕句 四首
 七言絕句 一百二十七首



